

মহাপুরুষচরিত ।

প্রথম খণ্ড ।

মহাপুরুষ এব্রাহিমের জীবনচরিত ।

“ যে ব্যক্তি স্বীয় আত্মার জ্ঞান রাখে না সে ব্যতীত কে এব্রাহিমের
ধর্মহইতে বিমুখ হয় ? সত্যই আমি তাহাকে ইহলোকে
গ্রহণ করিয়াছি, এবং সত্যই সে পরলোকে
সাধুদিগের একজন ।” (কোরাণ)

কলিকাতা ।

বিধান যন্ত্রে শ্রীরামসর্বস্ব ভট্টাচার্য্য দ্বারা
মুদ্রিত ও প্রকাশিত ।

১৮০৪ ।

মূল্য ১০ মাত্র ৯

श्री = ०१
५०८ २००८
२०/२०/२०२५

ভূমিকা ।

মানবজাতি দুই শ্রেণীতে বিভক্ত, মহাপুরুষ ও সাধারণ মনুষ্য । মহাপুরুষ যে সকল আধ্যাত্মিক ও মানসিক বিশেষ বিশেষ গুণ ও শক্তি লাভ করিয়া যেকোন অসাধারণ কার্য সাধন করেন, সাধারণ মনুষ্য তদ্রূপ কখন সংসাধন করিতে সক্ষম নহে । মহাপুরুষগণ ঈশ্বরের বিশেষ চিহ্নিত ; তাঁহারা প্রত্যক্ষভাবে ঈশ্বরহইতে ধর্মালোক জ্ঞানালোক লাভ করিয়া প্রভূত তেজ ও শক্তি সহকারে জগতে অদ্ভুত কার্য সকল সম্পাদন করেন । সাধারণ মনুষ্যগণ মহাপুরুষদিগের উপদেশ, জীবনের দৃষ্টান্ত ও আলোক অনুসরণ করিয়া উন্নতির পথে অগ্রসর হইয়া থাকেন । সর্বক্ষণ সকল স্থানে মহাপুরুষের আধির্ভাব হয় না, যখন পৃথিবীর বা দেশ বিশেষের বিশেষ অভাব ও ছরবস্থা হয় তখন পরমেশ্বর এক এক জন মহাপুরুষকে প্রেরণ করিয়া তাঁহান জীবন দ্বারা সেই অভাব মোচন ও অবস্থার সংশোধন করিয়া লন । ধর্মবিষয়ে বিজ্ঞান, কাব্য ও অন্য অন্য বিষয়ে জগতে জ্ঞানালোক বিস্তার করিবার জন্য বিশেষ বিশেষ প্রকৃতিসম্পন্ন মহাপুরুষ বিশেষ বিশেষ সময়ে প্রাদুর্ভূত হন । যথা এব্রাহিম মুসা ঈসা মোহম্মদ বুদ্ধ মানক চৈতন্য প্রভৃতি ধর্মবিষয়ে মহাপুরুষ ; সক্রেটিস, নিউটন গেলিলিও প্রভৃতি বিজ্ঞানবিষয়ে, কালিদাস, সেকন্দ্রপিয়র, ফরদোসী প্রভৃতি কাব্য বিষয়ে মহাপুরুষ ভিন্ন ভিন্ন সময়ে পৃথিবীর ভিন্ন ভিন্ন স্থানে জন্মগ্রহণ করিয়াছিলেন । বস্তুতঃ যিনি ঈদৃশ মহা কার্য সম্পাদন করেন যাহা অন্য লোকে সম্পাদন করিতে পারে না তিনিই মহাপুরুষ । অনেকে মনে করেন যে আমরাও চেষ্টা যত্ন করিলে ঈসা মুসা সক্রেটিস ও কালিদাস হইতে পারি, ইহা তাঁহাদের সম্পূর্ণ ভ্রম । তাঁহারা চেষ্টা যত্ন করিয়া জীবনের অনেক উন্নতি সাধন করিতে পারেন, সাধু ভক্ত জ্ঞানী কবি হইতে পারেন, কিন্তু মহাপুরুষ হইতে পারেন না । মহাপুরুষদিগের জীবনের সেই মহত্ব, ক্ষমতা ও অলৌকিকতা তাঁহাদের প্রাপ্য নহে । প্রথম শ্রেণীর মহাপুরুষের

অর্থাৎ ধর্মপ্রবর্তক মহাপুরুষের চরিত্র বর্ণন করা এই গ্রন্থের উদ্দেশ্য। অতএব ধর্মপ্রবর্তক মহাপুরুষ কাহাকে বলে তাহার বিশেষ লক্ষণ সঙ্ক্ষেপে বিবৃত হইতেছে।

ধর্মপ্রবর্তক মহাপুরুষকে সর্গীয় তত্ত্ববাহকও বলা হইয়া থাকে। সুনিখ্যাত পণ্ডিত ও মহা ধাৰ্মিক হোমহোল্ড্‌এন্‌লাস্‌এবুহামেদমোহম্মদ গজালি স্বরচিত কিমিয়ায়সাদতনামক প্রসিদ্ধ পারস্য ধর্ম গ্রন্থে তত্ত্ববাহকের এইরূপ লক্ষণ ব্যক্ত করিয়াছেন “ঈশ্বর তাঁহার প্রতি মানব জাতির কল্যাণ প্রদর্শনের পথ মুক্ত করিয়াছেন, যিনি তাহা লোকের নিকটে প্রচার করেন এইরূপ ব্যক্তিই সর্গীয় তত্ত্ববাহক এবং যে কলাণের পথ প্রদর্শিত হয় তাহাই ধর্মবিধি।” ধর্মপ্রবর্তক মহাপুরুষগণ প্রত্যক্ষভাবে ঈশ্বর হইতে ধর্মালোক লাভ করিয়া জগতে তাহা বিস্তার করেন, ধর্ম সংস্কার ও প্রত্যাদেশ প্রচার করিয়া বিষয়াসক্ত বিপথগামী লোকদিগকে মুক্তির পথ প্রদর্শন করা তাঁহাদের চির জীবনের ব্রত। তাঁহারা ঈশ্বরের একান্ত অহুগত ভৃত্য ও সর্বভাগী বৈরাণী হইয়া এই মহাব্রত সাধনে প্রাণপণে যত্ন করেন, প্রভুর আজ্ঞা পালন ব্যতীত তাঁহারা অন্য কিছু জানেন না, তজ্জন্যই তাঁহাদের জীবন ধারণ। এই মহাপুরুষদের জীবনের আলোকে জগৎ আলোকিত হয়, পৃথিবী নূতন শ্রী ধারণ করে, নর নারী চিরকাল পুণ্য প্রেম সত্য তাঁহাদের নিকটে লাভ করিয়া থাকেন। তাঁহারা জগতে নূতন আলোক ও নূতন সত্য দান করিবার জন্য আবির্ভূত হন, ভ্রম কুসংস্কার কর্দমে জড়িত সত্যরত্নকে উদ্ধার করিয়া নূতন আকারে প্রকাশ করেন, পূর্ববর্তী বিধান সকলকে সুসজ্জিত সমুদ্রত বেষে উপস্থিত করেন। তাঁহাদের জীবনের তেজ ও প্রতাপে ভূপালগণ পর্যাস্ত ভীত ও কম্পিত হন। পাপাসক্ত কপট বিষয়ী লোক ও পুরাতন প্রিয় স্বার্থপর কুসংস্কার মানবগণের পক্ষে মহাপুরুষদিগের জীবনের তেজ ও তাঁহাদের প্রচারিত নূতন আলোক সহ্য করা দুষ্কর হয়। তাহারা মহাপুরুষদিগকে নানা প্রকার অপমান ও লাঞ্ছনা করিতে এবং তাঁহার শোণিতপাত ও প্রাণসংহার পর্যাস্ত কবিত্তে ক্রটি কবে না। ইহার দৃষ্টান্তের অভাব নাই। প্রায় কোন মহাপুরুষই জীবদ্দশায় লোকের নিকটে আদৃত হন না। কেবল পরি

জ্ঞানার্থী সত্যপিপাসু লোকেরা তাঁহাকে শ্রদ্ধা করিয়া তাঁহার প্রদর্শিত পথের অনুসরণ করেন। তিনি কতিপয় চিহ্নিত অনুবর্তীর সাহায্যে জগতে বিধান প্রতিষ্ঠিত করিয়া যান। পূর্বতন কোন মহাপুরুষ যোগ, কেহ বা ভক্তি, কেহ বৈরাগ্যাত্ত্ব বিশেষভাবে প্রচার করিয়া গিয়াছেন। এইরূপ ভিন্ন ভিন্ন মহাপুরুষদিগের অনুবর্তীগণ তাঁহাদের প্রদর্শিত বিধির অনুসরণে সিদ্ধ হইয়া যোগী ভক্ত বৈরাগী নাম প্রাপ্ত হইয়াছেন। যিনি নানা প্রকার লাঞ্ছিত অপমানিত অনলে দগ্ধ বা ক্রুশে নিহত হইয়াছেন পরে সেই মহাপুরুষকেই লোকে ঈশ্বর বা ঈশ্বরের অবতার বলিয়া পূজা করিয়াছে। জীবদ্দশায় মহাপুরুষের পরীক্ষা সংগ্রাম কষ্ট যজ্ঞবার সীমা থাকে না। একে তিনি জগতের পাপ ও দুঃখ দুর্গতি দেখিয়া সর্বদা আকুল, তাহার উপরে আবার বিধান-বিরোধী অহঙ্কারী পাষণ্ড লোকদিগের দ্বারা সত্যের অবমাননা ও নানা প্রকার অত্যাচার। তিনি একমাত্র প্রভুর প্রসন্নানের প্রতি আশা ও বিশ্বাসপূর্ণ নয়নে দৃষ্টি করিয়া সমুদায় সহ্য করেন। পরিণামে সকল অন্ধকার কাটিয়া হ্রাশয় বিধানবিরোধীদিগের পরাজয় সত্যের জয় হয়, জগতে সর্গের বিধান প্রতিষ্ঠিত হয়।

যুগ ধর্মের প্রবর্তক মহাপুরুষদিগের জীবনে জীবন্ত ঈশ্বরের আশ্চর্য লীলা প্রকাশ পায়। লীলাময় হরি মহাপুরুষগণের আত্মাতেই মূর্তিমান হইয়া প্রকাশিত হন। মহাপুরুষগণ যে, সকল বিষয়ে পূর্ণ ও অভ্রান্ত তাহা নহে, তাঁহারা যে বিধি ও যে সত্য বিশেষ ভাবে প্রচার করিতে ঈশ্বর কর্তৃক আদিষ্ট ও নিয়োজিত তদ্বিষয়ে অভ্রান্ত। মহাপুরুষও অন্য অন্য মনুষ্যের ন্যায় শারীরিক মানসিক প্রকৃতিসম্পন্ন; তিনি মনুষ্য বৈ ঈশ্বর নহেন, সুতরাং তাঁহাতে অপূর্ণতা থাকিবেই। কোরাণশরিকে ঈশ্বরের উক্তি স্থলে উল্লিখিত হইয়াছে “বল (হে মোহম্মদ,) আমি তোমাদের ন্যায় মনুষ্য বৈ নহি।” মহাপুরুষদিগের মানবীয় ভাব ও দুর্বলতাদি আমরা ভাবিব না, তাঁহাদের জীবনে যে ঐশ্বরিক অংশ ও দেবত্ব বিরাজমান তাঁহাকে আদর ও শ্রদ্ধা করিয়া আমরা আমাদের চরিত্রকে তাঁহাদের দেব চরিত্রে পরিণত করিব। তাঁহাদের প্রেম ভক্তি বিশ্বাস বৈরাগ্যাদি আমাদের জীবনের অন্ন পান হইবে। নব-বিধান কোন বিশেষ মহাপুরুষের পক্ষপাতী নহেন, বিশেষ মহাপুরুষে নিবদ্ধ

নহেন, সকল দেশের সকল জাতীয় মহাপুরুষকে আদর করেন। তিনি সমুদয় মহাপুরুষের সমন্বয় সাধনে প্রবৃত্ত। বর্তমান বিধানবাদিগণ এ প্রদেশের কি ভিন্ন দেশের কি হিন্দু জাতীয় কি ইহুদি কি মোসলমান সকল দেশের সকল জাতীয় মহাপুরুষকে শিরোধার্য্য করিতেছেন, সকলকে সাদরে অভ্যর্থনা করিয়া আনিয়া তাঁহাদের নিকটে শিক্ষা লাভ করিতেছেন।

পরলোকগত মহাপুরুষদিগের জীবনচরিত আলোচনা ব্যতীত তাঁহাদের জীবনের গূঢ়তত্ত্ব ও মহান্ব্য অবগত হওয়ার অন্য উপায় নাই। সহস্র সহস্র বৎসর গত হইল তাঁহারা পৃথিবী পরিত্যাগ করিয়া গিয়াছেন, তথাপি জীবনচরিতের ভিতর দিয়াই তাঁহারা স্বয়ং জীবনের আলোক বিকীর্ণ করিয়া নর নারীর আত্মাকে আলোকিত করিতেছেন। নব বিধান মণ্ডলীর কোন সুযোগ্য ভ্রাতা মহাপুরুষ খ্রীষ্টচতন্যের জীবনচরিত স্থললিত বঙ্গ ভাষায় উৎকৃষ্ট প্রণালীতে লিখিয়া সকলের বিশেষ কৃতজ্ঞতা ভাজন হইয়াছেন, তিনি এইক্ষণ মহাপুরুষ ঈশার পবিত্র চরিত্র বঙ্গ ভাষায় প্রকাশে প্রবৃত্ত হইয়াছেন। স্বর্গীয় সাধু অঘোর নাথ মহাপুরুষ শাক্যসিংহের চরিতামৃত পান করাইয়া আমরাগিকে চরিতার্থ করিয়াছেন। মহাপুরুষ নানকের জীবন চরিতও লিখিত হইয়াছে, সত্তরই পুস্তকাকারে প্রকাশিত হইবে। পশ্চিম এশিয়া মহাতেজস্বী পুরুষরত্ন মহাপুরুষদিগের আকর। তুরুক ও আরব্য ভূমিতে কিয়ৎকাল অন্তর এক এক মহাপুরুষ জন্ম গ্রহণ করিয়া সূর্যের ন্যায় দীপ্তি প্রকাশ করিয়া গিয়াছেন। পৃথিবীর অন্য কোন প্রদেশে এতাদিক জ্যোতিষ্মান্ ধর্ম্মপ্রবর্তক পুরুষের আবির্ভাব হয় নাই। মহাপুরুষ এত্রা-হিমকে তত্রত্য প্রায় সমুদায় মহাপুরুষের আদি পিতা বলা যাইতে পারে। মুসা ঈসা দাউদ সোলয়মান মোহম্মদ প্রভৃতি ইহুদি ও মোসলমান মহাপুরুষ-গণ তাঁহারই বংশে জন্ম গ্রহণ করিয়াছেন। আমি পশ্চিম এশিয়ার কয়েক-জন মহাপুরুষের জীবনচরিত বঙ্গ ভাষায় সংকলন করিতে সঙ্কল্প করিয়াছি। এই গুরুতর কার্য্য সাধনে আমার নানাপ্রকার অযোগ্যতা ও অক্ষমতা আছে। কিন্তু যখন কোন সুযোগ্য লোক এ বিষয়ে সত্তর হস্তক্ষেপ করিবেন একরূপ সম্ভাবনা দেখিতেছি না, তখন আমাকেই নানা অযোগ্যতা সত্ত্বে প্রবৃত্ত হইতে হইল। আপাততঃ ইহুদি ও মোসলমান জাতির আদি

পিতা হনিফী ধর্মের প্রবর্তক মহাত্মা এত্রাহিমের জীবনচরিত বঙ্গ ভাষায় প্রকাশিত হইল। ক্রমশঃ মহাপুরুষ মুসা দাউদ ও হজরত মোহাম্মদের জীবন বৃত্তান্ত প্রকাশ করিতে ইচ্ছা রহিল। মেরাজোল্‌নবুঅত, জামেওত্তওয়া-রিখ, খোলাসতোল্‌আখিয়া এই কয়েক ইতিহাস গ্রন্থ অবলম্বন করিয়া এত্রাহিমের জীবনচরিত লিখা গেল। প্রসিদ্ধ পারস্য পুরাবৃত্ত মেরাজোল্‌নবুঅত হইতেই বিশেষ সাহায্য লাভ করা গিয়াছে। এই জীবনের অনেক ঘটনাই জনশ্রুতি মূলক, সত্যের সঙ্গে যে কল্পনা মিশ্রিত আছে তাহা বলা বাহুল্য। উক্ত পুস্তক সকলের লিখার মধ্যে সর্ব্বাংশে পরস্পর ঐক্য নাই। বহু গ্রন্থের সঙ্গে মিলাইয়া যতদূর সাধ্য সত্য উদ্ধার করিতে চেষ্টা করা গিয়াছে। বাইবেলের আদি পুস্তক ও কোরাণ শরিফ এবং তন্দ্ভাষ্য হইতেও কিছু কিছু আনুকূল্য প্রাপ্ত হওয়া গিয়াছে। এই দুই ধর্ম গ্রন্থে রীতিমত মহাপুরুষ এত্রাহিমের জীবন চরিত নাই, প্রসঙ্গমাত্র আছে।

লেখক।



সূচীপত্র ।

বিষয়	পৃষ্ঠা ।
হুঃসপ্ন দেখিয়া রাজা নমরুদের দ্রাস ও শিশুহত্যা	১
গর্ভমধ্যে এব্রাহিমের জন্ম	৩
মাতাপিতার নিকটে শিশু এব্রাহিমের প্রেরণ	৪
গর্ভের বাহিরে এব্রাহিমের আগমন	৬
এব্রাহিমকর্তৃক প্রতিমা সকলের অবমাননা	৭
এব্রাহিমের প্রতিমা ভঙ্গ করা	১০
নমরুদ ও এব্রাহিমের প্রশ্নোত্তর	১২
এব্রাহিমকে অগ্নিতে বিসর্জন ও তাহা হইতে তাঁহার নিষ্কৃতি	১৪
এব্রাহিমের ধর্মপ্রচার ও তাঁহার বাবেল রাজ্য পরিত্যাগ	১৫
এব্রাহিমের মেসরে গমন করা ও দুর্ঘটনায় পতিত হওয়া	১৭
এব্রাহিমের ফলসুতিনে গমন	১৯
এব্রাহিমের বাবেলে প্রত্যাগমন ও নমরুদের মৃত্যু	২০
এব্রাহিমের পুনর্কার কেনান দেশে যাত্রা	২১
এস্মায়িল ও এস্হাকের জন্ম এবং হাজেরার নির্কাসন	২২
জম্জমের উৎপত্তি ও মক্কা নগরের সূত্রপাত	২৪
পুত্র বলিদানে এব্রাহিমের প্রত্যাদেশ শ্রবণ করা ও তাহাতে প্রবৃত্ত হওয়া	২৭
কাবা মন্দির স্থাপন	৩১
এব্রাহিমের দান ও আতিথ্য সৎকার	৩২
এব্রাহিমের পুত্র মদয়ন	৩৩
এব্রাহিমের জীবনের মহত্ব	৩৪
উপদেশ বাণী	৩৫

মহাপুরুষ এব্রাহিমের জীবনচরিত ।

ছঃস্বপ্ন দেখিয়া রাজা নমরুদের ত্রাস ও শিশুহত্যা ।

আরব দেশের অন্তর্গত কুফা নগরের অনতিদূরে ফোরাত নদীর পূর্বে কূলে বাবেল নামে এক মহা সমৃদ্ধ নগর ছিল । এই নগর নমরুদ নামক ঈশ্বরদ্রোহী দুর্দান্ত রাজার রাজধানী ছিল । আমিই পরমেশ্বর আমাকে পূজা অর্চনা করিতে হইবে, নমরুদ স্থায়ী রাজা মধ্যে এই আজ্ঞা প্রচার করিয়াছিল । প্রজামণ্ডলী তাহাকেই ঈশ্বরপদে বরণ করিয়া পূজা করিতে বাধ্য হয়, সকলেই স্ব স্ব গৃহে ও সাধারণ মন্দিরে নমরুদের প্রতিমূর্ত্তি পূজার জন্য প্রতিষ্ঠিত করে । স্ত্রীপুরুষ বালক বৃদ্ধ যুবা সকল লোকেই নমরুদ প্রধান ঈশ্বর বলিয়া বিশ্বাস করে ও তাহার একান্ত অল্পগত ভক্ত হইয়া তাহার সেবায় ও আজ্ঞাপালনে রত থাকে । চন্দ্র সূর্য্য নক্ষত্রাদির পূজা ও অপর কোন কোন দেবদেবীর মূর্ত্তি পূজাও তখন সেদেশে প্রচলিত ছিল । একদা নমরুদ এক ভয়ঙ্কর স্বপ্ন দেখিয়া ভীত হয় এবং প্রধান প্রধান জ্যোতির্বিৎ পণ্ডিতগণকে ডাকিয়া আনিয়া স্বপ্নবৃত্তান্ত জ্ঞাপন করে ও তাহার শুভাশুভ ফলাফল ব্যাখ্যা করিতে অনুরোধ করে । নমরুদ স্বপ্নে দেখিয়াছিল যে আকাশমার্গে অতিশয় উজ্জ্বল একটি নক্ষত্র উদিত হইয়া আপন জ্যোতিতে চন্দ্র সূর্য্যের জ্যোতিকে পরাস্ত করিয়াছে । কেহ কেহ বলেন যে নমরুদ এরূপ স্বপ্ন দেখিয়াছিল, একটি প্রকাণ্ড হরিণ আসিয়া তাহার সিংহাসনে শৃঙ্গাঘাত করে, তাহাতে সিংহাসন ভগ্ন হইয়া যায় । যাহা হোক স্বপ্ন বৃত্তান্ত শ্রবণান্তর সুবিজ্ঞ জ্যোতির্বিদগণ স্মৃষ্কল্পে গণনা করিয়া নিবেদন করিল যে “মহারাজ, গ্রহনক্ষত্রাদির সম্বন্ধে গতি পর্যা-লোচনায় অবগতি হইল যে অচিরে আপনার রাজ্যে অতিশয় বিপ্লব উপস্থিত হইবে । বর্ত্তমান বর্ষে এক মহা তেজস্বী পুরুষ জন্ম গ্রহণ করিবেন, তিনিই

সেই বিপ্লবের কারণ হইবেন, তিনি মহারাজকে সিংহাসনচ্যুত করিবেন। সেই মহাপুরুষ প্রতিমাপূজার মূল উৎপাতন করিয়া জগতে নুতন ধর্মের প্রতিষ্ঠা করিবেন, তাঁহার অভ্যুদয়ে রাজত্বের মূল কম্পিত ও রাজবংশ বিলুপ্ত হইবে। তখন খলিদ নামক প্রধান জ্যোতির্বিদ রাজাকে বিশেষভাবে অনুরোধ করিল যে এই দুর্ঘটনা সজ্জাচিত হইবার পূর্বে তাহার প্রতি বিধানের চেষ্টা করা একান্ত আবশ্যিক। স্মৃতি এই যে রাজ্যের স্থানে স্থানে প্রহরীরূপে কতগুলি লোক নিযুক্ত করা যাউক, কোন পুরুষকে স্ত্রীসঙ্গ করিতে না দেওয়া তাহাদের কার্য হইবে। যে সকল নারী এই ক্ষণ গর্ভবতী আছে, তাহাদের কাহার পুত্র সন্তান প্রসূত হইলে প্রহরিগণ তৎক্ষণাৎ সেই শিশুকে হত্যা করিবে। ভয়াকুল নির্দয় নম্রদের নিকটে এই পরামর্শ অত্যন্ত যুক্তিযুক্ত বোধ হইল। নম্রদ অনন্যোপায় হইয়া আত্মজীবন ও রাজ্য সম্পদ রক্ষার জন্য তাহাই কর্তব্য বলিয়া স্থির করিল। বাবেল নগরে এক জন স্ননিপুণ প্রতিমানির্মািতা ছিলেন, তাঁহার নাম তেরখ, তাঁহার অপর নাম আজর, তিনি রাজার অতিশয় প্রিয়পাত্র ও বিশ্বাসভাজন ছিলেন। নম্রদ তাঁহার প্রতি প্রহরী নিযুক্ত করা আবশ্যিক বোধ করে নাই, বরং তাঁহাকে প্রহরীর কার্যে নিযুক্ত করিল। গর্ভবতী নারীদিগের প্রতি শত শত স্ত্রীলোক প্রহরী নিযুক্ত হইয়াছিল। তাহারা সর্বদা গৃহে গৃহে যাইয়া অন্তঃস্থান লইত, কাহার পুত্র সন্তান হইয়াছে জানিবামাত্র সেই শিশুটিকে কালভবনে প্রেরণ করিত। কথিত আছে এই নিষ্ঠুর হত্যাকাণ্ডে প্রায় লক্ষ শিশুর প্রাণনাশ হয়। তেরখের পত্নীর নাম আদনা। তিনি একদিন রজনীতে গোপনে আসিয়া স্বামীর সঙ্গে সন্মিলিত হন, তাহাতে তাঁহার গর্ভের সঞ্চারণ হয়। এই গর্ভেই মহাপুরুষ এব্রাহিম জন্ম গ্রহণ করেন। যে রাত্রিতে আদনা গর্ভবতী হয় তাহার পর দিন ভবিষ্যৎ-দৃষ্টিগণ রাজসন্নিধানে উপস্থিত হইয়া নিবেদন করিল “মহারাজ আপনি যে বালকের জন্য চিন্তিত আছেন, ও তাহার বিনাশ সাধনে যত্ন করিতেছেন, সে গত রজনীতে গর্ভস্থ হইয়াছে।” নম্রদ ইহা শ্রবণ করিয়া অত্যন্ত উদ্ভিগ্ন হইল, গর্ভপরীক্ষা ও শিশুহত্যা বিষয়ে অতিশয় দৃঢ়তা প্রকাশ করিতে লাগিল, চেষ্টা যত্নের একশেষ হইল।

গর্ভমধ্যে এভ্রাহিমের জন্ম ।

আদনা ঐতমতঃ স্বীয় অস্তঃসন্ধার বিষয়-স্বামীকে জ্ঞাপন করেন নাই । পরে যখন গোপন করা দুঃসাধ্য হইল তখন বলিলেন যে “আমি গর্ভবতী, আমার গর্ভে পুত্র সন্তান হইলে তাহাকে রাজার হস্তে-সমর্পণ করা যাইবে, তাহা হইলে আমাদের প্রতি মহারাজ অধিকতর প্রসন্ন হইবেন ।” এই কথা শুনিয়া তেরখ সন্তুষ্ট হইলেন । প্রসবকাল নিকটবর্তী হইলে আদনা স্বামীকে বলিলেন “সন্তান প্রসবের সময় প্রসূতির ভয়ানক বিপদ হইয়া থাকে, অনেকের জীবন রক্ষা কঠিন হইয়া পড়ে, আমি ভাবিত আছি যে সেই সময়ে বা প্রাণসংশয় বিপদে পতিত হই, এজন্য প্রার্থনা করিতেছি যে তুমি বিশেষ ব্রতাবলম্বনপূর্বক দেবমন্দিরে অবস্থান করিয়া আমার কল্যাণের জন্য প্রধান দেবের নিকটে প্রার্থনা করিতে থাক, তাহা হইলে আমি সেই বিপদের আবর্ত হইতে উদ্ধার পাইতে পারিব । যে পর্য্যন্ত আমার প্রসব না হয়, সে পর্য্যন্ত তুমি প্রার্থনা ও স্তুতি বন্দনাদি হইতে বিরত হইবে না ।” তদনুসারে তেরখ ভার্য্যার মঙ্গলার্থ ক্রমাগত চল্লিশ দিন মন্দিরে প্রধান দেবমূর্ত্তির ভজনা করেন, দিবা রাত্রি ভার্য্যার শুভ প্রসবের জন্য প্রার্থনা ও মিনতি করিতে থাকেন । ইত্যবসরে আদনা স্বীয় আবাসের অদূরে এক নির্জন প্রদেশে গর্ভ করিয়া মৃত্তিকার নিম্নে এক গৃহ প্রস্তুত করিলেন, ও প্রসবকালে যাহা যাহা প্রয়োজন তাহার আয়োজন করিয়া রাখিলেন এবং যথাকালে তথায় পুত্র প্রসব করিলেন । প্রসবান্তে তিনি স্বামীর নিকটে এই সংবাদ পাঠাইয়াছিলেন । তৎক্ষণে আজিজিয়া গ্রন্থে উল্লিখিত হইয়াছে যে নুহের জলপ্লাবনের সতর শত বৎসর পরে এভ্রাহিম জন্ম গ্রহণ করিয়াছিলেন । তেরখ মন্দির হইতে গৃহে প্রত্যাগমন করিয়া সন্তানের কথা জিজ্ঞাসা করিলে আদনা বলিলেন “অত্যন্ত রুগ্ন ও ক্ষীণাঙ্গ পুত্র হইয়াছিল, প্রসূত হইয়াই কালগ্রাসে পতিত হইয়াছে ।” তেরখ তাহার এই কথা সত্য বলিয়া বিশ্বাস করিলেন ও আদনা বিপনুজ হইয়াছেন ভাবিয়া দেবতাকে ধন্যবাদ দিলেন ।

মাতা পিতার নিকটে শিশু এব্রাহিমের প্রশ্ন ।

তেরখ যখন কার্য্যানুরোধে গৃহ হইতে বহির্গত হইতেন তখন আদনা সন্তানের তত্ত্বাবধান করিতেন, গর্ভের ভিতরে যাইয়া তাঁহাকে স্তন্য দান করিয়া আদিতেন । শিশুটিকে বস্ত্রাবৃত করিয়া গর্ভের এক পার্শ্বে যত্নপূর্বক রাখিয়াছিলেন । কপিত আছে, আদনার আগমনে বিলম্ব হইলে তিনি আপন অঙ্গুষ্ঠ চোষণ করিতেন, ঈশ্বরের ক্রুপায় অঙ্গুষ্ঠ হইতে ছুঙ্ক ও মধু তাঁহার মুখে নিঃসৃত হইত । প্রকৃত কথা এই ঈশ্বরের অল্পগ্রহে ও যত্নে সেই অন্ধকারময় গর্ভের ভিতরে এব্রাহিম নির্বিঘ্নে রক্ষিত হইয়াছিলেন, তখন তাঁহার স্নেহ ক্রোড়েই তিনি প্রতিপালিত হইতেছিলেন । শিশু সপ্তাহে যত দূর পুষ্ট ও বর্দ্ধিত হয় এব্রাহিম যেন একদিনে তদ্রূপ দেহোন্নতি লাভ করিতে লাগিলেন । তিনি শশিকলার ন্যায় দিন দিন বৃদ্ধি প্রাপ্ত হইয়া অল্পদিনের মধ্যেই অলৌকিক শ্রীধারণ করিলেন । তাঁহার রূপের ছটায় অন্ধকারপূর্ণ গর্ভ আলোকিত হইল । তিনি দুই বৎসর বয়ঃক্রম কালে স্তন্য ত্যাগ করিলেন । যখন তাঁহার বাক্য-ক্ষুট হইল, তখন হইতেই তদীয় অন্তরে স্বর্গীয় তত্ত্ব সকল প্রকাশিত হইতে লাগিল, জননীর নিকটে তিনি ঈশ্বরসম্বন্ধে প্রশ্ন করিতে আরম্ভ করিলেন । প্রথমে তিনি জিজ্ঞাসা করেন “আমার সৃষ্টিকর্তা কে ?” মাতা বলেন “আমি তোমার সৃষ্টিকর্তা ।” এব্রাহিম জিজ্ঞাসা করেন “তবে তোমার ঈশ্বর কে ?” আদনা বলিলেন “আমার ঈশ্বর তোমার পিতা তেরখ” । আবার এব্রাহিম প্রশ্ন করেন “তাঁহার সৃষ্টিকর্তা ?” জননী বলিলেন “মহারাজ নম্বুদ্ধ ।” এব্রাহিম পুনর্বার জিজ্ঞাসা করেন “রাজার ঈশ্বর কে ?” মাতা বলেন “চুপকর এরূপ কথা বলিও না, রাজা পরমদেব ও প্রধান ঈশ্বর । কেহই তদপেক্ষা শ্রেষ্ঠ নহে, তিনি সকলের ঈশ্বর ।” কথিত আছে যে একদা এব্রাহিম মাতাকে জিজ্ঞাসা করিয়াছিলেন “আমি অধিক সুন্দর, না তুমি ?” জননী বলিলেন “তুমিই অধিক সুন্দর ।” তিনি পুনর্বার জিজ্ঞাসা করিলেন “তোমার সৌন্দর্য্য অধিক, না পিতার ?” আদনা বলিলেন “আমার ।” এব্রাহিম জিজ্ঞাসা করিলেন “সৌন্দর্য্যে রাজা শ্রেষ্ঠ, না আমার পিতা ?” মাতা বলিলেন “তোমার পিতা রাজা

অপেক্ষা অধিক সুন্দর।” তখন এব্রাহিম বলিলেন “মাতঃ যদি আমার পিতার সৃষ্টিকর্তা মহারাজ নমস্কৃত, তবে তিনি আপনাকে অপেক্ষা অধিক সুন্দর করিয়া পিতাকে কেন সৃষ্টি করিলেন। তেরখ তোমার ঈশ্বর হইলে তিনি তোমাকে আপনাকে অপেক্ষা অধিকতর সৌন্দর্য্য কেন দান করিলেন? যদি তুমি আমার সৃষ্টিকর্তা, তবে আমাকে কেন আপনাকে অপেক্ষা অধিক রূপবানু করিলে?” মাতা বালকের এই কথার উত্তরদানে অক্ষম হইলেন। উদ্দিগ্ধচিত্তে স্বামীর নিকটে চলিয়া আসিলেন। তেরখ তাঁহার মুখ বিবর্ণ দেখিয়া বিষণ্ণতার কারণ জিজ্ঞাসা করিলেন। প্রথমতঃ তিনি প্রকাশ করিয়া বলিলেন না। পরে তেরখ বিশেষ অল্পরোধ করিলে বলিলেন “যে বালক রাজার প্রতিষ্ঠিত ধর্ম্মকে বিপর্য্যস্ত ও বিনষ্ট করিবে জ্যোতির্বিদগণ বলিয়াছেন সে তোমারই পুত্র।” তেরখ এই কথা শুনিয়া চমৎকৃত হইয়া জিজ্ঞাসা করিলেন “কোন্ বালক?” তখন আদনা এক এক করিয়া সমুদায় বৃত্তান্ত তাঁহাকে জানাইলেন। তেরখ পুত্রের বিবরণ অবগত হইয়া অতিশয় ক্রুদ্ধ হইলেন এবং তাঁহাকে বধ করিতে সঙ্কল্প করিয়া গর্ভে প্রবেশ করিলেন। যখন বালকের নিরুপম মুখচন্দ্রের প্রতি তাঁহার দৃষ্টি পড়িল তখন স্নেহ সঞ্চারিত হইয়া তাঁহাকে বাধা দিল, সন্তানকে হত্যা করিতে কিছুতেই তাঁহার মন সম্মত হইল না। তেরখকে দেখিয়াই শিশু এব্রাহিম তাঁহার সঙ্গে কথা কহিতে প্রবৃত্ত হইলেন। প্রথমে তিনি এই কথা জিজ্ঞাসা করিলেন “পিতঃ আমার ঈশ্বরকে?” তেরখ বলিলেন “তোমার মাতা।” এব্রাহিম জিজ্ঞাসা করিলেন “মাতার ঈশ্বরকে?” তেরখ বলিলেন “আমি।” বালক প্রশ্ন করিলেন “তোমার ঈশ্বরকে?” পিতা বলিলেন “নমস্কৃত।” এব্রাহিম জিজ্ঞাসা করিলেন “নমস্কৃতের ঈশ্বরকে?” এই বাক্য তেরখের অসহ্য হইল, তিনি বালককে চপেটাঘাত করিয়া বলিলেন “চূপকর, তুই এই কথা বলিবার উপযুক্ত নহিস্; রে ক্ষুদ্রবালক, এইক্ষণও তোমার মুখে স্তন্যের গন্ধ রহিয়াছে, তুই উচ্চ কথা বলি! বুড় ছেলে, তুই ঈশ্বর প্রসঙ্গরূপ উচ্চাসনে যাইয়া আরোহণ করিতেছিস্, ধর্ম্মগ্রন্থে লেখনী চালাইতেছিস্।” মূর্খ তেরখ বুঝিয়া উঠিতে পারে নাই যে স্বর্গের বিদ্যালয় হইতে শিশু এব্রাহিম জ্ঞান প্রাপ্ত হইতেছেন, গুচত্বয়ের আলোক স্বর্ণ

হইতে তাঁহার অন্তরে সঞ্চারিত হইতেছে। যে জ্ঞান ঐশ্বরিক জ্ঞান ভাণ্ডার হইতে প্রকাশ পায় তাহা নিঃসংশয় অজ্ঞান, যে ব্যক্তি ঐশ্বরিক জ্ঞানের কথা বলেন তিনি তৎস্বের সমুদ্রে নিমগ্ন হইয়া থাকেন।

গর্ভের বাহিরে এব্রাহিমের আগমন।

একদিন এব্রাহিম জননীকে জিজ্ঞাসা করিলেন “মাতঃ, এই যেস্থানে আমি আছি ইহা ব্যতীত কি আর স্থান আছে?” জননী বলিলেন “বৎস, ইহা অন্ধকারময় সঙ্কীর্ণ গর্ভ, ভয়ঙ্কর স্থান, শত্রুর আক্রমণভয়ে তোমার জন্য এই স্থান মনোনীত করিয়াছি ও শত্রুর হস্ত হইতে রক্ষা করিবার জন্য তোমাকে এখানে রাখিয়াছি। নতুবা বিস্তৃত ভূমি ও উন্নত আকাশ বিদ্যমান, পৃথিবীর সীমা পাওয়া যায় না, জগতের অন্ত নাই।” এব্রাহিম ইহা শ্রুতিয়া গর্ভের বাহির হইবার জন্য প্রার্থনা করিলেন। প্রার্থনা পূর্ণ হইল। আদনা স্বামীর মত গ্রহণ করিয়া এব্রাহিমকে বাহিরে লইয়া আসিলেন। তখন মহাশয় এব্রাহিমের বোড়শ বৎসর বয়ঃক্রম। সন্ধ্যাকালে তিনি সঙ্কীর্ণ গর্ভ হইতে বহির্গত হইয়া প্রসারিত ভূমিতে পদার্পণ করেন, সর্বপ্রথমে গগণ প্রান্তে একটি উজ্জ্বল নক্ষত্র তাঁহার নয়ন গোচর হয়। তিনি সেই নক্ষত্রটিকে দেখিয়াই আনন্দে বলিয়া উঠেন “ইহাই কি আমার পরমেশ্বর?” পরে যখন নক্ষত্র অন্তমিত হইল, “না, এ আমার পরমেশ্বর নয়, যে বস্তু চঞ্চল ও অন্তগত হয় তাহাকে আমি ঈশ্বর বলিতে পারি না।” অতঃপর ভুবন মোহন সুধাকর উদ্ভিত হইয়া স্তব্ধমল জ্যোৎস্নাজালে ধরাতলকে উৎসাসিত ও অল্পরঞ্জিত করিল, ইহা দেখিয়াই এব্রাহিম পুলকিত অন্তরে বলিয়া উঠিলেন “এই বুঝি আমার ঈশ্বর।” পরে চন্দ্রমা অন্তমিত হইলে বলিলেন “না, না, এ আমার ঈশ্বর নয়, আমি অন্তগামী বস্তুকে ঈশ্বর বলিয়া প্রেম করিব না।” পরে পূর্ব দিকে প্রভাকর প্রভা বিস্তার করিল, এই জ্যোতির্শয় সূর্য্যকে দেখিয়া মহা উৎসাহে এব্রাহিম বলিয়া উঠিলেন “ইহাই বুঝি আমার ঈশ্বর” পরিশেষে সূর্য্যকে অন্তগত হইতে দেখিয়া তাহাকেও অস্বীকার করিলেন। তখন তাঁহার অন্তর্শুকু বিশেষরূপে উদ্ভিলিত হইল, তিনি বাহ্য বস্তু ও বাহ্য

জগৎ ছাড়িয়া অন্তর্জগতে অতীন্দ্রিয় পরমেশ্বরকে প্রাপ্ত হইলেন। নক্ষত্র ও চন্দ্র সূর্য্যাদি জড় পদার্থের ভিতর দিয়া বিশ্বপতি আসিয়া অন্তরে তাঁহাকে দর্শন দিলেন। তখন তিনি দুর্জয় বিশ্বাস বল লাভ করিলেন, এবং অকূতোভয়ে জলন্ত বিশ্বাসের কথা সকল বলিয়া জড়বাদী পৌত্তলিক দিগকে কম্পিত করিতে লাগিলেন। এত্রাহিমের নক্ষত্র দর্শনাবধি কোরাণের কয়েকটা উক্তির অম্ববাদ এস্থানে উদ্ধৃত করিয়া দেওয়া গেল। “অনন্তর যখন তৎপ্রতি রাত্রি অন্ধকারাচ্ছন্ন হইল, সে এক নক্ষত্রকে দেখিয়া বলিল ইহাই আমার প্রতিপালক; পরে যখন তাহা অস্তমিত হইল, তখন বলিল আমি অস্তগামী বস্তু সকলকে প্রেম করি না। পরে যখন চন্দ্রমাকে সমুদিত দেখিল সে বলিল ইহাই আমার প্রতিপালক; পরে যখন তাহা অস্তমিত হইল, বলিল যদি পরমেশ্বর আমাকে পথ প্রদর্শন না করেন তবে আমি বিপথগামী দিগেবু একজন হই। অনন্তর যখন সূর্য্যকে সমুদিত দেখিল, সে বলিল ইহাই আমার প্রতিপালক, ইহাই শ্রেষ্ঠ, পরে যখন তাহা অস্তমিত হইল, সে বলিল হে লোক সকল, তোমরা যে (ঈশ্বরের) অংশী স্থাপন কর নিশ্চয় আমি তাহা হইতে বিমুখ আছি। যিনি ছালোক ভুলোক সৃজন করিয়াছেন সত্যই আমি তাঁহার দিকে স্বীয় আনন সমুদ্যত রাখিয়াছি, আমি সত্য ধর্ম্মাবলম্বী, আমি পৌত্তলিক নহি। তাহার স্বগণ তাহার সঙ্গে বিবাদ করিলে সে বলিল “ঈশ্বর বিষয়ে তোমরা কি আমার সঙ্গে বিরোধ করিতেছ? নিশ্চয় তিনি আমাকে পথ প্রদর্শন করিয়াছেন, আমার ঈশ্বর যাহা কিছু ইচ্ছা করিতেছেন তাহা বাতীত তোমরা তাঁহার সঙ্গে বাহাকে অংশীরূপে স্থাপন করিতেছ আমি তাহাকে ভয় করি না, আমার ঈশ্বর জ্ঞান প্রভাবে সমুদায় পদার্থকে ঘেরিয়া রহিয়াছেন, তোমরা কি উপদেশ গ্রহণ করিতেছনা?” (সূরা এনাম।)

এত্রাহিম কর্তৃক প্রতিমা সকলের অবমাননা।

আদনা এত্রাহিমকে গর্ভের বাহিরে আনিয়া গৃহে লইয়া গেলেন। তাঁহার প্রতি অতুল স্নেহ ও আদর যত প্রদর্শন করিতে লাগিলেন। এ

দিকে পৌত্তলিকতা বিনাশ করিয়া সত্য ধর্ম প্রচার করিতে এত্রাহিমের মন উৎসাহী ও উত্তেজিত হইয়া উঠিল। তিনি প্রতিমা সকলের প্রতি ও প্রতিমাপূজকদিগের প্রতি উপহাস বিক্রম করিতে লাগিলেন। একদিন পিতাকে বলিলেন “তাত, তোমার কি লজ্জা হয় না, পরমেশ্বর যে উত্তমাদ্ব শীর্ষ স্বজন করিয়াছেন তাহা কাষ্ঠ খণ্ডের নিকটে প্রণত ও ভূমিতলে অবনুষ্ঠিত কর, যে, মন স্বর্গীয় তত্ত্বালোক লাভের অধিকারী তাহাকে চন্দ্র সূর্য্য নক্ষত্রের প্রেমে উৎসর্গ করিতেছ? যাহার দর্শন শক্তি শ্রবণ শক্তি নাই, তুমি এমন বস্তুকে পরমেশ্বর বলিয়া পূজা করিতেছ, সে তোমাকে কোনরূপ ফল দান করিতে সক্ষম নহে। ঈশ্বরকে ছাড়িয়া যাহার পূজা করিবে সেই ইন্ধনস্বরূপ হইয়া তোমার জন্য নরকের অগ্নি উদ্দীপন করিয়া তুলিবে। তেরথ স্বীয় উপাদ্যদেবদিগের বিরুদ্ধে পুত্রের এই সকল উক্তি শুনিয়া মহাক্রুদ্ধ হন, তাঁহাকে বিশেষ রূপে ভৎসনা ও শাসন করেন।

তেরথ কাষ্ঠদ্বারা প্রতিমা গঠন করিতেন; প্রতিমা নির্মাণে তাঁহার ন্যায় স্ননিপুণ শিল্পী কেহই ছিল না। তিনি যে সকল দারুণময়ী মূর্ত্তি গঠন করিতেন তাহা অন্য সকল কারিকরের নিশ্চিত মূর্ত্তি অপেক্ষা সর্ব্বাংশে সুন্দর ও উৎকৃষ্ট হইত, এবং অধিক মূল্য দিয়া লোকে তাহা গ্রহণ করিত। তিনি আপন সম্মান গণের প্রতি প্রতিমা বিক্রয়ের ভার অর্পণ করিতেন, তাহার তাহা বাজারে ও অন্য অন্য স্থানে লইয়া গিয়া বিক্রয় করিত। বিক্রয়ের রীতি এই যে বিক্রেতা বণিকগণ আপন বিক্রয় বস্তুর প্রশংসা করিয়া থাকে, সেই গুণ বর্ণনা শুনিয়া লোকে তাহা ক্রয় করিতে আগ্রহ করে। এত্রাহিমের জাভুগণও প্রতিমা সকলের নানা প্রকার গুণ ব্যাখ্যা করিয়া তাহা অধিক মূল্যে বিক্রয় করিত। একদিন তেরথ একটি পরম সুন্দর বৃহৎ প্রতিমা গঠন করিয়া বাজারে লইয়া বিক্রয় করিবার জন্য এত্রাহিমের প্রতি অর্পণ করেন। এত্রাহিম পিতার শাসন ও অনুরোধে বাধ্য হইয়া প্রতিমা সহ গৃহ হইতে বহির্গত হন, কতক দূর যাইয়াই প্রতিমার পদে রজ্জু বন্ধন করিয়া পথে পথে ও বাজারে তাহা টানিয়া লইয়া যাইতে লাগিলেন এবং বলিতে লাগিলেন “যে বস্তু দ্বারা কোন উপকার হয় না, কাহার কোন রূপ অনিষ্ট করিবারও যাহার কিঞ্চিন্মাত্র ক্ষমতা নাই কে এমন বস্তু ক্রয় করিতে চাহে?”

এইরূপে তিনি যত দূর হইতে পারে প্রতিমার নিক্ষেপ ঘোষণা করিতে ছিলেন এবং মূর্ত্তিটী আবর্জনাপূর্ণ স্থান ও ধূলি কর্দমের মধ্য দিয়া টানিয়া চলিয়া ছিলেন। তাহা দেখিয়া কেহই তাহা ক্রয় করিতে ইচ্ছুক হইল না, এত্রাহিমের কথায় ও ব্যবহারে প্রতিমাসম্বন্ধে লোকের ভক্তি বিশ্বাস হ্রাস হইতে লাগিল। গৃহে প্রত্যাগমনকালে এত্রাহিম একটি জলপ্রণালীর তীরে উপস্থিত হন। তিনি প্রতিমার মুখ জলে স্থাপন করিয়া বলিতে লাগিলেন “ঠাকুর, ক্রান্ত হইয়াছ, পিপাসা পাইয়াছে জল পান কর।” তখন প্রতিমার উপাসকদিগের নিবুদ্ধিতা ভাবিয়া হাসিতে লাগিলেন। যখন তিনি নানা প্রকার দুর্গতি ও লাঞ্ছনা করিয়া প্রতিমাকে গৃহে কিরাইয়া আনিলেন, তখন পিতা জিজ্ঞাসা করিলেন “তুমি কেন এই প্রতিমাকে বিক্রয় করিলে না? তোমার ভ্রাতৃগণ উপযুক্ত মূল্যে সমুদায় প্রতিমা বিক্রয় করিয়া আদিয়াছে।” এত্রাহিম বলিলেন “ভাত, তোমার এই প্রতিমার গ্রাহক নাই, তোমার এই ঈশ্বরকে কেহই আদর করে না।” তেরথ বলিলেন “তুমি প্রতিমার গুণ বর্ণনা কর না, ইহাই অনাদরের একটা কারণ, এ নগরের লোক বিক্রয় বস্তুর প্রশংসা না শুনিলে ক্রয় করিতে চাহে না।” এত্রাহিম বলিলেন “পিতঃ, আমি কেমন করিয়া প্রশংসা করি, এসকল বস্তু কোন প্রশংসারই যোগ্য নহে। ইহার অন্ধ ও বধির এবং নিতান্ত দুর্বল। হে পিতা, যাহার দর্শন ও শ্রবণশক্তি নাই, যে তোমার হিতাহিত করিতে কিছুমাত্র সক্ষম নহে, তুমি তাহাকে পূজা করিও না।”

উক্ত হইয়াছে যে এক দিবস এত্রাহিম একটি প্রতিমাকে পথে পথে ঘুরাইতেছিলেন এবং বলিতেছিলেন যে ইহা দ্বারা কোন প্রয়োজন সিদ্ধ হয় না, যে ব্যক্তি কিনে তাহার অর্থক্ষতি হয় মাত্র।” উচ্চৈঃস্বরে এই কথা বলিতে বলিতে তিনি এক গলির ভিতর প্রবেশ করেন, তথায় একটি বুদ্ধা নারী গৃহের বাহির হইয়া বলিল, “এত্রাহিম, তোমার পিতা কোথায়? তাহা হইতে আমি একটি দেবমূর্ত্তি ক্রয় করিব।” এত্রাহিম বলিলেন “আমি হইতে কেন ক্রয় কর না?” বুদ্ধা বলিল “তুমি আমাদের পরমেশ্বরের নিক্ষেপ করিয়া থাক, প্রশংসা কর না, এজন্য তোমা হইতে কিনিব না।” এত্রাহিম জিজ্ঞাসা করিলেন “তুমি যে ঈশ্বরকে গৃহে রাখিয়াছিলে তাহা

কি হইল ?” বৃদ্ধা বলিল “গত রজনীতে তাহা চোরে চুরি করিয়া লইয়া গিয়াছে।” এব্রাহিম কহিলেন “আমিও তোমার ঈশ্বরের প্রশংসা করি শ্রবণ কর।” আমার নিকট তোমার এমন ঈশ্বর আছে যে তুমি তদ্বারা চুল্লী উষ্ণ করিয়া রুটিকা প্রস্তুত করিতে পারিবে, যদি তুমি অন্ন পাক করিতে চাও তিনি তোমার অনস্থালী উষ্ণ করিয়া ততুলকে অগ্নে পরিণত করিয়া দিবেন।” বৃদ্ধা এই কথা শুনিয়া লজ্জায় অধোমুখ হইয়া রহিল। তখন এব্রাহিম বলিলেন, “যদি এই ঈশ্বর ক্রয় না কর অন্য ঈশ্বর আছে, বিপদে পড়িলে তোমাকে তিনি আশ্রয় দিবেন, ডাকিলে শুনিবেন, তোমার প্রার্থনা তিনি গ্রাহ্য করিবেন। ছুংথের প্রান্তরে শাস্ত ও অবসন্ন ব্যক্তিদিগকে তিনি দয়া করেন ও তাহাদিগকে কল্যাণের পথ প্রদর্শন করিয়া থাকেন। তিনি অল্পতাপানলে দধি পাতকীর উপরে ক্ষমাবারি বর্ষণ করেন। তিনি স্তন্যপায়ী শিশুরূপ পাপগ্রস্ত আত্মাকে দয়ার স্তন হইতে পুণ্য প্রেমরূপ দুগ্ধ দান করিয়া থাকেন, তাহার নাম উচ্চারণে রসনার শোভা, তাহার গুণ শ্রবণে প্রাণের শাস্তি।” এই কথা শ্রবণে বৃদ্ধার মনের দ্বার খুলিয়া গেল, সে বলিল “এব্রাহিম, এইরূপ ঈশ্বরকে স্মরণমূল্যে ক্রয় করা যায় না, আমি নিতান্ত দরিদ্র।” এব্রাহিম বলিলেন “ভাবনা নাই, একটি মন্ত্র বলি, তাহার সাহায্যেই তুমি তাহাকে লাভ করিতে পারিবে। তুমি বিশ্বাস করিয়া এই মন্ত্র উচ্চারণ কর।” নারী তৎক্ষণাৎ সেই মন্ত্র উচ্চারণ করিল, এবং বলিল “এব্রাহিম, প্রীতিজ্ঞা করিলাম যেপর্যন্ত জীবন আছে তোমার পর-মেশ্বরের দ্বারে মস্তক স্থাপন করিয়া থাকিব।” তৎপর এব্রাহিম গৃহে চলিয়া গেলেন।

এব্রাহিমের প্রতিমা ভঙ্গ করা।

এব্রাহিম অল্পকণ স্বীয় ধর্মের মহিমা কীর্তন ও তৎপ্রতি আগ্রহ প্রকাশ এবং পৌত্তলিকতার নিন্দা ও তাহার প্রতি স্থগা প্রদর্শন করিতে লাগিলেন, তদ্বারা পুত্তলিকার এইরূপ অবমাননা হইতেছে দেখিয়া লোকসকল নিঃস্বমনে তেরথের নিকটে যাইয়া অভিযোগ করিল। তেরথ পুত্রকে অনেক

তিরস্কার ও নানা প্রকার ভয় প্রদর্শন করিলেন। এত্রাহিমও তাঁহাকে সমুচিত উত্তর দান করিলেন। তাহাতে নগরবাসিগণ বলিতে লাগিল “এত্রাহিম, তুমি এ কিরূপ নূতন ধর্ম আবিষ্কার করিলে, পিতা পিতামহের ধর্মকে বিলুপ্ত করিতে চলিলে।” তিনি বহিলেন “বিনি আমাকে সৎপথ প্রদর্শন করিয়াছেন ও ঈশ্বরের দ্বার আমার প্রতি উন্মুক্ত করিয়াছেন এবং আমাকে তোমাদের পরমেশ্বরগণের সংস্রব হইতে দূরে আনিয়াছেন ভোমরা কি তাঁহার অস্তিত্বের প্রমাণ আমার নিকটে অন্বেষণ করিতেছ?” তখন তিনি ঈশ্বরের অস্তিত্ব ও তাঁহার জ্ঞান শক্তি প্রেমের কথা এবং পুস্তলিকার হীনতা ও নির্জীবতা যত দূর হইতে পারে মুক্তকণ্ঠে জলন্ত ভাবে প্রচার করিতে লাগিলেন। সর্গ হইতে তাঁহার নিকটে এই সুসংবাদ আসিতে লাগিল যে “এত্রাহিম, একত্ববাদ, ঈশ্বরীয় ধর্ম প্রচার কর, ধনী দরিদ্র জ্ঞানী মূর্খ সকলকে সত্য পথ প্রদর্শন কর।” সেই সময়ই হইতে এত্রাহিম ধর্ম প্রচারের জন্য রাজা প্রজা ধনী দরিদ্র সকলকে আস্থান করিয়া সভা করিতে আরম্ভ করিলেন। ইতি মধ্যে সেদেশের এক মহোৎসব উপস্থিত হইল। সেই উৎসবের এই রীতি ছিল যে সকলে নানা প্রকার স্মখাদ্য সামগ্রী ও বহুবিধ উৎকৃষ্ট পরিচ্ছদ প্রস্তুত করিতেন, উৎসবের দিন প্রাতঃকালে সেমস্ত নগরের প্রধান মন্দিরে লইয়া গিয়া পুস্তলিকা সকলের সম্মুখে রাখিয়া দিতেন ও তাহাদিগকে প্রণাম করিয়া উৎসবক্ষেত্রে চলিয়া যাইতেন, প্রত্যাগমন কালে পুনর্বার মন্দিরে আসিয়া সেই সকল খাদ্য সামগ্রীকে দেবতাদের প্রসাদ জ্ঞানে ভোজন করিতেন, তাঁহার মনে করিতেন যে তাহা করিলে আরোগ্য লাভ হয় ও শরীর সুস্থ থাকে। পরিচ্ছদ সকল দেবতা দিগের স্মৃষ্টিতে বিশেষ গুণ প্রাপ্ত হইয়াছে বলিয়া পরিধান করিতেন, তাহা পরিলে সম্বৎসর কাল সুখে ও আনন্দে এবং সুখ্যাতিতে যাপন করা যায়, তাঁহাদের এই সংস্কার ছিল। উৎসব দিনের উষা কালে নগরবাসিগণ নির্দিষ্ট প্রণালী অনুসারে খাদ্য সামগ্রী ও পরিচ্ছদাদি মন্দিরে স্থাপন করিয়া উৎসবক্ষেত্রে চলিয়া গেলেন, স্ত্রী পুরুষ বালক বৃদ্ধ যুবা সকলে যাইয়া উৎসবে যোগ দিলেন। এদিকে এত্রাহিম কোন্ হুল করিয়া উৎসবক্ষেত্রে না যাইয়া গৃহে বসিয়া রহিলেন। সকল লোক চলিয়া গেলে মন্দিরক্ষে

শূন্য দেখিয়া তিনি কুঠার হস্তে তন্মধ্যে প্রবেশ করিলেন এবং প্রতিমা-
দিগের সম্মুখে নানা প্রকার চব্য চোষ্য লেছ পেয় সামগ্রী স্থাপিত দেখিয়া
ব্যঙ্গ করিয়া জিজ্ঞাসা করিলেন “ঈশ্বরগণ, ইহা খাইতেছ না কেন ? ব্যাপার
কি কথা বলিতেছনা কেন ?” এই বলিয়া পুন্ডলদিগের উপর কুঠারাঘাত
করিতে লাগিলেন। সেই গৃহে সত্তর আশিটি প্রতিমা স্থাপিত ছিল। তিনি
প্রথমতঃ তাহাদের সকলের হস্ত ছেদন করিলেন, অবশেষে সমুদায় মূর্তিকে
ছিন্ন ভিন্ন করিয়া ভূমিতলে ফেলিলেন। তন্মধ্যে উচ্চসিংহাসনে স্থাপিত
নানা রত্নে খচিত একটি পরম সুন্দর ধাতুময়ী বৃহৎ প্রতিমা ছিল। তাহাকে
মাত্র অক্ষত রাখিয়া তাহার স্বন্ধে পরশু স্থাপন করিলেন, এবং মন্দিরের দ্বার
পূর্ববৎ বন্ধ করিয়া চলিয়া গেলেন। যখন নগরবাসিগণ উৎসবক্ষেত্রহইতে
প্রত্যাগমন করিয়া মন্দিরে প্রবেশ করিলেন তখন পূজনীয় দেবতাদিগকে
কুঠারাঘাতে ছিন্ন ভিন্ন ও ভূপতিত দেখিয়া সকলে শোকে আর্তনাদ করিতে
লাগিলেন ও চীৎকার বলিয়া উঠিলেন “কে আমাদের পরমেশ্বরগণের প্রতি
এইরূপ আচরণ করিল, নিশ্চয় সে অভ্যাচারী পান্ডু।” তাঁহারা জানিতেন
যে পুন্ডলিকার প্রতি এত্রাহিমের নিদারুণ আক্রোশ ও বিদ্বেষ, তিনি উৎসবে
যোগ না দিয়া গৃহে একাকী ছিলেন, তাঁহা দ্বারাই এই দুর্ভাগ্য হইয়াছে সকলে
বিশ্বাস করিলেন। প্রধান প্রধান লোকেরা নম্রুদের নিকটে যাইয়া এতদ্বিষয়
জানাইলেন। নম্রুদ জিজ্ঞাসা করিল “ঈশ্বরগণকে কে এরূপ অবমাননা
করিল ?” সকলেই এত্রাহিমের একাধী প্রকার নির্দেশ করিলেন। ইহা শুনিয়া
নম্রুদ এত্রাহিমকে রাজসভায় উপস্থিত করিবার জন্য আজ্ঞা করিল।

নম্রুদ ও এত্রাহিমের প্রশ্নোত্তর ।

এত্রাহিম নিঃশঙ্কভাবে নম্রুদের সম্মুখে আগমন করিলেন। তখন এই-
রূপ রীতি ছিল যে যে ব্যক্তি রাজার নিকটে উপস্থিত হইত সর্বাগ্রে সিংহাসন
পার্শ্বে ভূমিষ্ঠ হইয়া প্রণাম করিত। এত্রাহিম সেই রীতির অনুসরণ করিলেন
না, তিনি সেই অহঙ্কারী পাণ্ডিত্য রাজকে ভূমিষ্ঠ হইয়া প্রণাম করিতে কিছুতেই
সম্মত হইলেন না। নম্রুদ প্রণাম না করার কারণ জিজ্ঞাসা করিলে এত্রা-

হিম বলিলেন “আমি পরমেশ্বর ব্যতীত অন্য কাহাকে নমস্কার করি না।” নমস্কার জিজ্ঞাসা করিল “কে তোমার পরমেশ্বর?” এত্ৰাহিম বলিলেন “বিনি জীবন দান ও প্রাণ হরণ করেন তিনিই আমার পরমেশ্বর।” এই কথা শুনিয়া নমস্কার কারাগারহইতে প্রাণদণ্ডের আজ্ঞাপ্রাপ্ত ছই জন কারাবাসীকে আনয়ন করিয়া তখন সেই দুই জন কারাবাসীর এক জনকে মুক্তি দান অপর জনের শিরশ্ছেদন করিল। তাহাতেই নমস্কার এক জনের জীবন দান অন্য জনের প্রাণ হরণ করিল মনে করিতে লাগিল। সেই মূর্খের এত দূর জ্ঞান ছিল না যে জীবনদানে জীবনের সৃষ্টি বুঝায়, কাহার প্রাণদণ্ডে বিরত হওয়া নয়; প্রাণহরণ অর্থে হত্যা করা নয়, হত্যাদি ক্রিয়া ব্যতিরেকে প্রাণকে দেহচ্যুত করা। ইহা নমস্কার ও তাহার ক্ষুদ্র বুদ্ধি অহুবর্তীগণের মনে কিছুতেই স্থান পাইল না। যাহা হউক তখন এত্ৰাহিম বলিলেন “ঈশ্বর সূর্যকে পূর্বদিকে উদ্ভিত পশ্চিমদিকে অস্তমিত করেন, যদি ভূমি পশ্চিম দিকে সূর্যকে উদ্ভিত করিতে পার তবে তোমার ঈশ্বরত্বের স্পর্ধা করা শোভা পায়।” এই কথা শুনিয়া নমস্কার নিরুত্তর হইল। এবিষয়ে আর কোন কথা উত্থাপন না করিয়া এত্ৰাহিমকে জিজ্ঞাসা করিল “আমাদের পরমেশ্বরগণের প্রতি তজ্জপ দুর্ক্যবহার কে করিল?” তিনি বলিলেন “প্রধান পরমেশ্বরটী অর্থাৎ যুহৎ পুত্তলটী এ কাণ্ড করিয়া থাকিবেন। তাঁহাকে জিজ্ঞাসা কর, তিনি বলিবেন।” তখন রাজার অহুচরগণ বলিল “ভূমি কি জ্ঞাত নও যে প্রতিমা সকল কথা বলিতে অক্ষম, কোন ক্রিয়া তাঁহাদের দ্বারা হয় না, একাধিক কোন প্রতিমা করিয়াছেন কেমন করিয়া বলিতেছ?” এত্ৰাহিম বলিলেন “ভাল মন্দ করিতে যাহার কোন ক্ষমতা নাই, বরং আপনাদের উপর অত্যাচার হইলে নিবারণ করিতে পারে না, তাহাকে পূজা করা কি তোমাদের নিতান্ত নিবুদ্ভিতার কার্য নয়?” পৌত্তলিকগণ ইহার উত্তর দানে অক্ষম হইলেন। সকলে লজ্জিত হইয়া অধোমুখে রহিলেন, আপনাদিগকে অপমানিত বোধ করিতে লাগিলেন। অন্তঃপার আপনাদের উপাস্য দেবদিগের অপমান ও দুর্গতির প্রতিক্রিয়ার জন্য এত্ৰাহিমকে গুরুতর শাস্তিদানে শাসন করিতে পরামর্শ দিবার করিলেন।

নমরুদ তাঁহাকে কারাগারে প্রেরণ করিয়া তৎপ্রতি কি বিশেষ শাস্তি বিধান করিবেন মন্ত্রিগণের সঙ্গে মন্ত্রণা করিতে লাগিলেন। সকলের পরামর্শে এব্রাহিমকে প্রজ্জলিত অগ্নিতে ফেলিয়া দণ্ড করা স্থির হইল।

এব্রাহিমকে অগ্নিতে বিসর্জন ও তাহা হইতে

তাঁহার নিষ্কৃতি।

মহাত্মা এব্রাহিমকে অগ্নিতে বিসর্জন করা ও তাহা হইতে তাঁহার নিরাপদে নিষ্কৃতি লাভ ব্যাপারে পারস্য ইতিহাসলেখকগণ নানা অলৌকিক ক্রিয়া ও অপ্রাকৃতিক ঘটনার কথা বাহুল্য রূপে বর্ণন করিয়াছেন, বঙ্গীয় লেখক তাহার অনুসরণ না করিয়া সজ্জেক্ষেপে সার সার কথা দ্বারা উক্ত ঘটনাটী ব্যক্ত করিতেছে। কেহ বলেন চল্লিশ দিন কেহ বলেন সাত বৎসর এব্রাহিম কারাগারে অবরুদ্ধ ছিলেন। পরে নমরুদ সেই জ্যোতিষ্মান পুরুষকে প্রজ্জলিত ভয়ঙ্কর হতাশনে নিষ্ক্ষেপ করে। একটি পর্বত-মূলে কাঠভার আহরণ করিয়া অগ্নি উদ্দীপন করা হয়। মহাশঙ্কে অগ্নি আকাশে ভয়ানক শিখা বিস্তার করিলে হস্তপদ বন্ধন করিয়া এব্রাহিমকে পর্বতের উপর হইতে বিশেষ যত্নযোগে তাহাতে নিষ্ক্ষেপ করে। রাজ-কিঙ্করগণ তাহাকে দণ্ড করিয়া হত্যা করিবার জন্য যখন অগ্নির নিকট আনয়ন করিল, তিনি সিংহের ন্যায় অকুতোভয়ে আসিলেন, তখন সেই ধর্মবীরের বদনে আশ্চর্য্য সর্গীয় জ্যোতি, নয়নে যেন অগ্নিস্কুলিঙ্গ প্রকাশ পাইতেছিল। তিনি বিশ্বাস ও ভক্তির সহিত স্বীয় প্রভুকে দৃঢ়রূপে আশ্রয় করিয়াছিলেন। পরমেশ্বর তাঁহাকে আশীর্বাদ ও সাহায্য দান করিতেছিলেন। তিনি প্রভুর বলে বলীয়ান হইয়া সেই ভীষণ বহ্নিকে আলিঙ্গন করিতে প্রস্তুত হইয়াছিলেন। ঈশ্বর সেই প্রলয়ান্বিতিকে নির্বাণ করিয়া ভক্তের প্রাণ রক্ষা করিবার জন্য বড় বৃষ্টি প্রেরণ করিলেন। ইতিহাসলেখকগণ বলেন যে মেঘ ও বায়ুর দেবতা আসিয়াছিলেন বটে কিন্তু তাঁহাদের কোন কার্য্য করিতে হয় নাই। এব্রাহিম অগ্নিতে

বিসর্জিত হইয়া ছিলেন, ঈশ্বরের আদেশে তাঁহার গাত্ররোমে ও পরিধান বস্ত্রেও অগ্নির উত্তাপের সঞ্চার হয় নাই, অগ্নি শীতল হইয়া গিয়াছিল। কথিত আছে যে স্থানে হতাশন প্রজ্জলিত হইয়াছিল সেই স্থান পুষ্পোদ্যানে পরিণত হয়। দেবতাগণ এই অগ্নিপরীক্ষা ব্যাপার দর্শন করিবার জন্য স্বর্গ হইতে অবতীর্ণ হইয়া ছিলেন। তখন তাঁহারা সকলে ভক্তের জয়ঘোষণা ও ঈশ্বরকে ধন্যবাদ করিলেন। ভয়ঙ্কর অগ্নি মথো অলৌকিকরূপে এত্রাহিমের জীবন রক্ষা পাইতে দেখিয়া সকলে চমৎকৃত হইলেন।

এত্রাহিমের ধর্ম প্রচার ও তাঁহার বাবেল রাজ্য পরিত্যাগ।

যখন এত্রাহিম সেই ভয়ঙ্কর অগ্নির ভিতর হইতে অক্ষত শরীরে বাহিবে চলিয়া আসিলেন, তখন শত সহস্র লোক এই অলৌকিক ব্যাপার দর্শনে তাঁহার প্রতি বিশ্বাস স্থাপন করিয়া তাঁহার নিকটে ধর্ম গ্রহণ করিতে আরম্ভ করিলেন। এত্রাহিমের ভ্রাতৃপুত্র লুত তাঁহাকে পরমেশ্বর প্রেরিত পদে বরণ করিয়াছিলেন এত্রাহিমের নিকটে ধর্মে দীক্ষিত হইলেন। এত্রাহিমের পিতৃব্যপুত্রী সারা নামী এক পরম রূপবতী মহিলা এত্রাহিম কর্তৃক ধর্মে দীক্ষিত হন, পরে এত্রাহিম তাঁহার পাণি গ্রহণ করেন। কেহ কেহ বলেন যে সারা হেরাণ দেশের রাজার কন্যা ছিলেন, যে সময়ে এত্রাহিম হেরাণে যাইয়া বাস করেন তখন তাঁহাকে বিবাহ করিয়াছিলেন। সারা যে এত্রাহিমের পিতৃব্য কন্যা একথাই অধিকতর প্রামাণিক। বহুলোক এত্রাহিমের ধর্ম গ্রহণ করিল, দিন দিন তাঁহার ধর্মের উন্নতি ও অনুবর্তীর সখ্যা বৃদ্ধি হইতে চলিল এবং চতুর্দিকে মহা আন্দোলন উপস্থিত হইল, ইহা দেখিয়া নমরুদ চিন্তিত ও ভীত হইল। এক দিন তাঁহাকে নিকটে ডাকিয়া বলিল “তোমার এই নূতন ধর্মের প্রচারে আমার রাজ্যে শান্তি রক্ষা পাইতেছে না, রাজকীয় কার্যে বিঘ্ন ও শাসন প্রণালীতে নানা বিশৃঙ্খল উপস্থিত হইয়াছে, এই কারণে তুমি আপন বন্ধু বাব্ব ও অনুরাগণ সহ এদেশ হইতে চলিয়া যও, ঈশ্বর তোমাকে রক্ষা করিবেন, তিনি তোমার সহায় ও বন্ধু আছেন।” এত্রাহিম

এই কথার সম্মত হইলেন; তখন তিনি বাবেল রাজ্য পরিত্যাগ করিয়া কেনান অভিমুখে যাত্রা করিলেন। পুনশ্চ উক্ত হইয়াছে যে এব্রাহিমের প্রজ-লিত অগ্নিহইতে নিরাপদে প্রাণ রক্ষা পাওয়ারূপ অলৌকিক ক্রিয়া দর্শন করিয়া নম্রুদ ক্রত্যস্ত চমৎকৃত হয়, এব্রাহিমের বিশেষ প্রতাপ ও ক্ষমতা আছে বুঝিতে পারে, তাঁহার মনে ভয়ের সঞ্চার হয়। তখন নম্রুদ এব্রাহিমের নিকটে যাইয়া ভূমিতলে মস্তক স্থাপন পূর্বক বলে “এব্রাহিম, আমি তোমার ঈশ্বরের সান্নিধ্য লাভ করিতে ইচ্ছু; তাঁহার জন্য কিছু বলির সামগ্রী উপস্থিত করিতেছি।” এব্রাহিম বলিলেন “তাঁহার প্রতি বিশ্বাস স্থাপন না করিলে তিনি বলিদান গ্রাহ্য করিবেন না। যে পর্যন্ত তিনি ভিন্ন ঈশ্বর নাই এই সত্যে বিশ্বাস স্থাপন করিয়া তাঁহার ধর্ম গ্রহণ না করিবে তোমার কোন অনুরোধই ফলপ্রদ হইবে না।” নম্রুদ বলিল “এব্রাহিম, ধন সম্পদ মান সম্বলের মায়া পরিত্যাগ করিতে পারিব না, যখন তোমাদ্বারা আমি ঈশ্বরের ক্ষমতা দর্শন করিলাম তখন তাঁহার নিকটে আমার দীনতা স্বীকার করা কর্তব্য।” এই বলিয়া নম্রুদ চারি সহস্র গো, কোন কোন ইতিহাসবক্তা বলিয়াছেন যে চল্লিশ সহস্র গো ও চল্লিশ সহস্র ছাগ ও উষ্ট্র ঈশ্বরোদ্দেশ্যে বলিদান করিয়াছিল। রাজা ধর্ম গ্রহণেও উদ্যত হইয়াছিল, কিন্তু মন্ত্রিগণ তাহাতে বাধা দেয়, এব্রাহিমের পিতৃব্য হারাগনামক ব্যক্তি নম্রুদের প্রধান দটিব ছিল। সেই বিশেষভাবে নিবারণ করিয়া বলে “আপনি পৃথিবীর ঈশ্বর হইয়া স্বর্গের ঈশ্বরের দাস হইবেন, আপন ঈশ্বরত্ব পরিত্যাগ করিবেন আপনার পক্ষে অত্যন্ত লাজ্জনা ও অপমান।” নম্রুদ তাহার এই মন্ত্রণা গ্রাহ্য করে। পরমেশ্বর এব্রাহিমকে নম্রুদের সঙ্গ পরিত্যাগ করিতে আদেশ করেন, তাহাতে তিনি বাবেল নগর পরিত্যাগ করিয়া চলিয়া যান।

তখন এব্রাহিম হনিক * ধর্ম প্রচার আরম্ভ করিলেন, নর নারী

* “হনিক” শব্দের অর্থ সত্য ধর্মে প্রতিষ্ঠিত। এব্রাহিমের এক উপাধি “হনিক” তাঁহার প্রচারিত ধর্মকে এজন্য “হনিকী” ধর্মবলে। এব্রাহিমের অপর উপাধি “খলিলালা”। ইহার অর্থ ঈশ্বরের সত্য বন্ধু।

সেই ধর্ম গ্রহণ করিতে লাগিল। নমরুদ ও নমরুদের অল্পবর্তী লোকদিগের ইচ্ছা হইল যে তাঁহাকে হত্যাকরে, তিনি অনলে দগ্ধ হইলেন না ভাবিয়া তাহারা তাঁহার হত্যা দুঃসাধ্য মনে করিল, সুতরাং তাঁহাকে নির্দাসন করাই যুক্তি যুক্ত বলিয়া জানিল। এব্রাহিম লুত ও সারাকে সঙ্গে করিয়া বাবেল নগর হইতে প্রস্থান করিলেন। একদিনের পথ চলিয়া গেলে পর সারার পাণিগ্রহণ করিতে তাঁহার প্রতি প্রত্যাদেশ হইল, তদনুসারে তিনি সারাকে বিবাহ করেন। অতঃপর একটি গর্ভভ ক্রয় করিলেন ও সারাকে তদুপরি আরোহণ করাইয়া হেরাণ অভিযুখে যাত্রা করিলেন। তখন এব্রাহিমের বয়ঃক্রম আটত্রিশ বৎসর। তিনি হেরাণে যাইয়া কিছুকাল অবস্থিতি করেন, তথাহইতে মেসর দেশাভিমুখে চলিয়া যান।

এব্রাহিমের মেসরে গমন করা ও দুর্ঘটনায় পতিত হওয়া।

মেসরে কিবতী বংশীয় সাদুক নামক এক পশুপ্রকৃতি দুর্দাস্ত নরপতি ছিল। সাদুক কোথাও কোন স্তন্দরী নারী আছে জানিতে পাইলে তাঁহাকে বলপূর্বক ধরিয়া আনিয়া আপন অস্ত্রপুরে বদ্ধ করিত। যখন এব্রাহিম মেসরের নিকটে উপনীত হইলেন, লুত তাঁহাহইতে বিচ্ছিন্ন হইলেন। এক বিশেষ জাতিকে ধর্মালোক দান করিবার জন্য তিনি পরমেশ্বর কর্তৃক প্রেরিত পদে বরিত হইয়াছিলেন। কোরাণের ভাষ্য তফসির হোসেনীতে লুতের সম্বন্ধে এইরূপ উল্লিখিত হইয়াছে, “লুত আজরের পৌত্র হারণের পুত্র ও মহান্বা এব্রাহিমের ভ্রাতৃপুত্র। এব্রাহিম যখন বাবেলহইতে কেনান দেশে চলিয়া যান তখন লুত তাঁহার সঙ্গে ছিলেন। পরমেশ্বর লুতকে প্রেরিত্ব দান করিয়া মওতফক্কাতনামক স্থানের অধিবাসীদিগের নিকটে প্রেরণ করেন। মওতফক্কাতে পাঁচটি নগরের সম্মিলন। সাদোমা সেই সকল নগরের মধ্যে প্রধান ছিল। আমুরা, দাউমা, সাবুরা ও সউদা অপর চারিটি নগর। প্রত্যেক নগরে চারি সহস্র লোকের বাস ছিল। লুত সাদোমাতে আগমন করিয়া তথাকার অধিবাসীদিগের নিকটে ধর্ম প্রচার করেন। উনত্রিশ বৎসর তিনি সেখানে বাস করিয়া সংকর্ষে প্রবর্তিত ও দুর্কর্মহইতে নিবৃত্ত

হইবার জন্য উপদেশ দেন। উক্ত নগরবাসী পুরুষদিগের ছুক্দিয়ার মধ্যে বিগর্হিত ব্যাভিচার প্রধান ছিল। ঈশ্বর সেই সকল লোকের পরিণাম জানাইলেন।”

এদিকে এব্রাহিম মেসরের দুরাচার রাজার চরিত্র শ্রবণ করিলেন এবং জানিতে পাইলেন যে, স্থানে স্থানে স্মন্দরী স্ত্রীলোকের অনুসন্ধানার্থ রাজার ভৃত্য সকল নিযুক্ত আছে, ইহা অবগত হইয়া তিনি অত্যন্ত ভাবিত হইলেন। অনন্যোপায় হইয়া এক সিন্দুক প্রস্তুত করিয়া সারাকে সেই সিন্দুকের ভিতরে স্থাপনপূর্বক মেসরে প্রবেশ করিলেন। তথায় রাজনিয়োজিত শুক্গ্রাহী লোকেরা সিন্দুকের মধ্যে বিশেষ বাণিজ্য দ্রব্য আছে ভাবিয়া তাহা উদঘাটন করিয়া দেখিতে চাহে। এব্রাহিম তাহাতে অনেক আপত্তি করেন ও বহু অহ্ননয় বিনয় করিয়া তাহাদিগকে সিন্দুক উদঘাটনে নিবৃত্ত থাকিতে বলেন, তাঁহার এই অহ্নরোধ বিফল হয়। তাহারা সিন্দুক উন্মোচন করিয়া তন্मध्ये সেই ভুবনমোহিনী কামিনীকে দেখিয়া বিস্ময়সাগরে নিমগ্ন হয়, এবং রাজাকে যাইয়া এই সংবাদ জ্ঞাপন করে। রাজা সংবাদমাত্র সারাকে অস্তঃপুরে লইয়া যায়। তখন এব্রাহিম নানা প্রকার ছল কৌশল করিয়াও সারাকে রক্ষা করিতে পারিলেন না। সেই দুরাচার রাজা সারার রূপলাবণ্যে মোহিত হইয়া যায়, হস্ত প্রসারণ পূর্বক তাঁহার পরিত্র অঙ্গ স্পর্শ করিতে সমুদ্যত হয়। সতী আকুল হইয়া পরমেশ্বরের শরণাপন্ন হন ও কাতরভাবে প্রার্থনা করিতে থাকেন। বিপদভঞ্জন পরমেশ্বর তাঁহাকে আশ্রয় দান করেন। তখন ঈশ্বরের অভিসম্পাতে সাহুকের হস্ত স্পন্দনশক্তিহীন অসার হইয়া পড়ে। তাহার মহাত্রাস উপস্থিত হইল, সে চতুর্দিক্ অন্ধকার দেখিতে লাগিল, তাহার প্রাসাদ যেন *কাঁপিয়া উঠল। সতীর প্রতি অভ্যাচার করাতে তাঁহার পবিত্র জীবনের তেজ প্রভাবে এই দুর্ঘটনা ঘটিতেছে সাহুক ইহা বুঝিতে পারিয়া তাঁহাকে কাতর ভাবে বলিল যে “আর আমি এরূপ দুর্কর্ম করিব না, তুমি প্রসন্ন হইয়া আমাকে ক্ষমা কর।” ঈশ্বর প্রসাদে তখন তাহার মনের উদ্বেগ চলিয়া যায় ও হস্ত প্রকৃতিস্থ হয়। কথিত আছে এই শিক্ষা পাইয়াও সাহুক পরক্ষণে ভুলিয়া যায়, পুনর্ব্বার কুপ্রবৃত্তির বশীভূত হইয়া পড়ে ও আপন কলঙ্কিত হস্ত প্রসা-

রণ করে। আবার তাহার মনে উদ্বেগ ও অশান্তি এবং হস্ত অবসন্ন হয়, পুনর্বার সারার প্রসন্নতা ভিক্ষা করিয়া সেই বিপদ হইতে রক্ষা পায়। তিনবার এরূপ ঘটনা হইয়াছিল, পরে সাহুক বিশেষরূপে অল্পতপ্ত হইয়া সেই দুর্ভিক্ষি সম্পূর্ণরূপে পরিত্যাগ করে, এবং সবিনয়ে সারাকে জিজ্ঞাসা করে “দেবি, তুমি কে? তোমার বিবরণ আমি জানিতে ইচ্ছা করি।” সারা বলিলেন “আমি ঈশ্বরপ্রেমিক মহাত্মা এব্রাহিমের ভার্য্যা, ঈশ্বর আপন ভক্তদিগের রক্ষক ও আশ্রয়, কাহার সাধ্য যে তাঁহার ভক্তের সহধর্মিণীর প্রতি অত্যাচার করে? আমি স্বামীর সঙ্গে এদেশে আগমন করিয়া তোমা কর্তৃক বিপদগ্রস্ত হইয়াছি, আমার মুক্তির প্রতীক্ষায় তিনি বহির্দেশে স্থিতি করিতেছেন।” তখন এব্রাহিম ঈশ্বরের শরণাপন্ন হইয়া অবিশ্রান্ত প্রার্থনা করিতেছিলেন। সাহুক হাজেরা নামী এক পরম রূপবতী দাসীকে সারাকে উপহার দেয়, কথিত আছে সাহুক হাজেরার প্রতি ও অত্যাচার করিতে উদ্যত হইয়াছিল, তাহাতে ও তাহার হস্ত অসার হইয়া পড়ে, ও সে নানা ক্রেশে পতিত হয়, পবে অল্পতপ্ত হইয়া সেই সঙ্কল্প পরিত্যাগ করে। অতঃপর সাহুক এব্রাহিমের নিকটে আসিয়া ক্ষমা প্রার্থনা করে ও তাঁহাকে পোমোষাদি অনেক পশু উপহার দেয়। সারা রাজপ্রাসাদহইতে বাহিরে আসিয়া এব্রাহিমকে উপাসনায় প্রাপ্ত হন। এব্রাহিম পত্নীর সতীত্ব রক্ষার বিষয়ে নিঃসংশয় হইয়া আনন্দমনে ঈশ্বরকে পুনঃ পুনঃ ধন্যবাদ করেন।

এব্রাহিমের ফলসূতিনে গমন।

অতঃপর এব্রাহিম মেসরে অবস্থিতি করা উচিত বোধ করিলেন না, তথায় হইতে তিনি সুব্রীক কেনানের অন্তর্গত ফলসতিন নামক প্রদেশে চলিয়া যান, সেদেশের একজন শূন্য স্থানে ঘাইয়া বাস করেন। সেখানে জলাশয় ছিল না, তিনি একটি কূপ খনন করেন, তাহাতে প্রভূত জল উৎপন্ন হয়, এমত কি কূপের মুখ ছাপিয়া ভূমিতে নির্মলজলের স্রোত প্রবাহিত হইতে থাকে। তাঁহার সঙ্গে অল্প পরিমাণ খাদ্য ছিল, কিয়দ্দিন পরেই তাহা নিঃশেষিত হয়। ঈশ্বর রূপায় তিনি সেই অরণ্য ভূমিতে অলৌকিকরূপে খাদ্য প্রাপ্ত হন।

অবশেষে সেই কূপের বৃত্তান্ত শ্রবণ করিয়া তৃষ্ণাভুর লোকেরা দেশদেশান্তর হইতে সেই স্থানে আসিয়া উপস্থিত হয়, বহুলোক তথায় বাসস্থান স্থাপন করে, ক্রমে সেই বনভূমি নগরে পরিণত হয়। সমাগত লোকেরা প্রথমতঃ ধর্ম গ্রহণ করিয়া এব্রাহিমের আত্মগত্য স্বীকার করে, পরে ধর্মদ্রোহী অবাধ্য ও শত্রু হইয়া উঠে, তিনি তাহাদের ব্যবহারে দুঃখিত হইয়া সেই স্থান পরি-
 ছ্যাগ করিয়া চলিয়া যান। রমলা ও আয়লিয়া ভূমির মধ্যবর্তী কেশু নামক স্থানে যাইয়া বাস করেন। বয়তোলম্বকন্দসের নামান্তর আয়লিয়া। এব্রাহিম চলিয়া গেলে পর উক্ত কূপের জল অত্যন্ত কমিয়া যায়, তখন তাঁহার শত্রুগণ আপনাদের অসদাচরণের জন্য দুঃখিত ও অল্পতপ্ত হয়, তাহারা এব্রাহিমের নিকটে যাইয়া তাঁহাকে তথায় ফিরিয়া যাইবার জন্য অনেক অল্প-
 নয় বিনয় করে, তিনি সম্মত হন না। কথিত আছে এব্রাহিম তাহাদের মঙ্গল প্রার্থনা করেন, তাহাতে পুনর্বার কূপের জল বৃদ্ধি হয়।

এব্রাহিমের বাবেলে প্রত্যাগমন, ও নম্বরুদের মৃত্যু।

যখন এব্রাহিম ফনসতিন প্রদেশে বাস করিতেছিলেন তখন তাঁহার প্রতি ঈশ্বরের আদেশ হয় যে তুমি নম্বরুদের নিকটে যাইয়া তাহাকে ও তাহার অনুচরবর্গকে সত্য ধর্ম গ্রহণ করিতে আহ্বান কর। এব্রাহিম তদনুসারে বাবেলে যাইয়া নম্বরুদকে বলিলেন “তুমি বল যে ঈশ্বর ব্যতীত উপাস্য নাই, এই সত্যে বিশ্বাস স্থাপন কর ও ঈশ্বরকে এক মাত্র প্রভু বলিয়া তাঁহার শরণাপন্ন হও।” নম্বরুদ ইহা শুনিয়া ক্রোধাক্ত হইয়া বলিল “তোমার ঈশ্বরদ্বারা আমার কোন প্রয়োজন নাই, দেখ্ আমি তোমার ঈশ্বরহইতে স্বর্গরাজ্য কাড়িয়া লইতেছি। আমি তোমার ঈশ্বরের সঙ্গে সংগ্রাম করিব, তাহাকে বল্ যেন আমার সঙ্গে যুদ্ধ করিতে সৈন্যে উপস্থিত হয়।” দুরাভা নির্বোধ নম্বরুদ এইরূপ অহঙ্কার প্রকাশ করিয়া যুদ্ধের আয়োজনে প্রবৃত্ত হইল, বহু ক্রোশ ব্যাপিয়া লক্ষ লক্ষ সৈন্য শ্রেণীবদ্ধ করিল ও ঈশ্বরের সৈন্যের প্রতীক্ষা করিয়া রহিল, এবং গর্ক করিয়া এব্রাহিমকে বলিতে লাগিল, “কোথায় তোমার ঈশ্বর ও তাহার সৈন্য, ভয় পাইয়াছে বুঝি।” এব্রাহিম

বলিলেন “ব্যস্ত হইও না, শীঘ্র আমার প্রভু পরমেশ্বর তোমাকে উত্তম রূপে শিক্ষা দিবেন। স্বর্গহইতে তাঁহার দুর্জয় সৈন্য আসিবে, প্রতীক্ষা কর।” এত্রাহিম ঈশ্বরের প্রতি নির্ভর করিয়া রহিলেন। ইতিমধ্যে রণক্ষেত্রের আকাশ যেন প্রলয় মেঘে আচ্ছন্ন হইল, উহা মেঘ নয় কন্যা মশক-পুঞ্জ, ঈশ্বরের প্রেরিত অগণ্য সৈন্য; সেই মশক রাশি গভীর নাদে চতুর্দিক অন্ধকার ময় ও আকাশকে আচ্ছন্ন করিয়া আসিয়া নম্রদের সৈন্যকে আক্রমণ করিল। সেনাগণের শরীর ও অশ্ব উষ্ট্রাদি বন্য পশুর গাত্র আপাদ মস্তক মশকজালে আচ্ছাদিত হইল, তাহাদের কর্ণ ও নাসারন্ধ্রে পুঞ্জ পুঞ্জ মশক প্রবেশ করিল। মশকের দংশনে তাহারা চীৎকার করিয়া সমর ক্ষেত্র হইতে পলায়ন করিতে লাগিল, এবং দলে দলে প্রাণত্যাগ করিল। নম্রদের নাসাচ্ছিদ্রে একটি মশা প্রবেশ করিয়া তাহাকে ভয়ানক যন্ত্রণা দিল। কথিত আছে তাহাতেই তাহার মৃত্যু হইল।

এত্রাহিমের পুনর্বার কেনান দেশে যাত্রা।

নম্রদ প্রাণত্যাগ করিলে পর তাহার অমাত্য ও অন্য অন্য প্রধান রাজকর্মচারী এত্রাহিমের নিকটে আসিয়া নিবেদন করিল যে “এপর্যন্ত এরাজ্য নম্রদের ছিল, এইক্ষণ আপনার হইল, রাজ্য শাসন সম্বন্ধে যাহা বিহিত হয় করুন।” এত্রাহিম বলিলেন “পৃথিবীর রাজত্বদ্বারা আমার কোন প্রয়োজন নাই, যে রাজ্যে আমি বাস করিতেছি তাহা অবিনাশী রাজার রাজ্য, আমি সেই অবিংশ্বর প্রভুর কিঙ্কর। এদেশ ও মেসর দেশ ভূপতি সিংগের স্থান, কেনান দেশ ধর্ম প্রবর্তক প্রেরিত পুরুষগণের বিহার ভূমি। আমি এরাজ্যে বাস না করিয়া কেনানে যাইয়া বসতি করিব।” তখন নম্রদের অহুচর ও জ্ঞাতিবর্গ বলিল “আপনার সঙ্গে আমরাও কেনানে যাইয়া অবস্থিতি করিব।” তৎপর এত্রাহিম সদলে কেনান অভিযুখে যাত্রা লেন। প্রথমতঃ রহিয়া নামক স্থানে উপস্থিত হন, তিনি সেই স্থানের শোভা বর্দ্ধন করেন, তথা হইতে ফোরাভ নদীর কূলে আপনাদের একটি নগর স্থাপন করেন, সেই নগরের নাম রকিয়া। সেই স্থান হইতে

২১-৫৭
Acc 22008
২৩/১০/২০২৬



চলিয়া যান, তথা হইতে যেখানে মেসরাধিপতি হাজেরা কে সারা দেবীর হস্তে সমর্পণ করিয়াছিল, তথায় উপনীত হন। তখন মেসর রাজ্যেশ্বর সাদ্ধকের ধর্মে মতি হয়, সাদ্ধক এত্রাহিমের নিকটে আসিয়া ধর্মগ্রহণ করে। ফলতঃ যিনি মহান্না খলিলান্নার নিকটে উপস্থিত হইতেন, তিনিই ধর্মে আকৃষ্ট হইয়া দীক্ষিত হইতেন এবং কিয়ৎক্ষণ তাঁহার সঙ্গে বাস করিয়া বিদায় লাভ করিতেন। তৎপর এত্রাহিম দমস্কে আগমন করিয়া তথাকার অধিবাসীদিগকে ধর্মপ্রণালী শিক্ষা দেন। দমস্ক হইতে তিব নগরে আসিয়া উপনীত হন। তাঁহার আগমন সংবাদ শুনিয়া ধর্মজ্রোহী নগরবাসিগণ পলাইয়া যায়, কেবল ধর্মবিশ্বাসী লোকেরা উপঢৌকন সহ আসিয়া এত্রাহিমের সঙ্গে সাক্ষাৎ করেন। তিনি তথা হইতে কেনানে উপস্থিত হন ও ফলস তিনে যাইয়া সারার সঙ্গে সাক্ষাৎ করেন, সারা তাঁহার কুশলাগমনে অত্যন্ত আনন্দিত হইয়া দরিদ্রদিগকে বহু অর্থ দান করেন !

এশ্মায়িল ও এস্হাকের জন্ম ও হাজেরার নির্বাসন।

সারা বক্ষ্যা ছিলেন, যৌবনকাল অতীত হইয়া গেল, তথাপি সন্তান হইল না, ইহা দেখিয়া তিনি স্বামীকে বলিলেন “তুমি হাজেরাকে বিবাহ কর, হয় তো পরমেশ্বর তাহার গর্ভে তোমাকে পুত্র সন্তান দান করিবেন ও তোমার বংশ রক্ষা পাইবে।” তাহাতে এত্রাহিম হাজেরাকে পত্নীরূপে গ্রহণ করেন। হাজেরা পরম রূপবতী যুবতী ছিলেন। তাঁহার গর্ভের সঞ্চার হইল, তিনি যথাকালে একটি পরম সুন্দর পুত্র প্রসব করিলেন। মোহম্মদীয় জ্যোতি এই সন্তানেই সঞ্চারিত হইল। ইহার বংশেই জ্যোতি-স্মান পুরুষ মোহম্মদ জন্ম গ্রহণ করিয়াছিলেন। এই বালকই মোসলমান জাতির আদি পুরুষ। হিব্রু ভাষায় এই বালকের আশ্মুয়ল নাম হয়, পরে তিনি এশ্মায়িল নামে প্রসিদ্ধ হন। এত্রাহিম পুত্রকে অতিশয় সুন্দর ও সুলক্ষণাক্রান্ত দেখিয়া মুগ্ধ হন ও তাঁহার প্রতি অত্যন্ত যত্ন ও আদর প্রদর্শন করিতে থাকেন, এক মুহূর্ত্ত তাঁহাকে চক্ষের অন্তরাল করিতে কষ্ট বোধ করেন। সারা অনপত্যা, দাসী হাজেরা পুত্রবতী হইল, পুত্রের জন্য সে স্বামীর

বিশেষ আদর ও শ্রীতি লাভ করিল, ইহা দেখিয়া তাঁহার মনে ঈর্ষ্যানল প্রজ্বলিত হইল, তিনি হাজেরার নানা প্রকার অশিব-চিন্তা করিতে লাগিলেন। ইতিমধ্যে ঈশ্বর আজ্ঞা করিলেন “এব্রাহিম, তুমি সারাকে বিষয় রাখিও না, সর্ব্ব প্রযত্নে তাহার মনোরঞ্জন কর, সে যাহা ইচ্ছা করে তাহা সম্পাদন কর।” এব্রাহিম হাজেরা অপেক্ষা সারাকে অধিক সম্মান ও সেবা করিতে বাধ্য ছিলেন। অন্তরে ঈশ্বরের এই আদেশ প্রাপ্ত হইয়া তিনি সারার মনোগত অভিপ্রায় জানিতে ইচ্ছু হন ও তাঁহাকে জিজ্ঞাসা করেন “হাজেরার সম্বন্ধে তোমার মানস কি বল।” সারা বলিলেন, “যেস্থানে লোকালয় নাই, জল নাই, শস্যক্ষেত্র নাই এমন স্থানে হাজেরাকে পুত্র সহ নির্বাসিত করিয়া আইন, এই আমার ইচ্ছা, তাহা হইলে আমার সন্তোষ সাধন হয়।” এব্রাহিম এই কথায় সম্মত হইলেন, তিনি হাজেরা ও এন্মায়িলকে সঙ্গে করিয়া বোরাক * আরোহণে মক্কার প্ৰান্তরে চলিয়া গেলেন। তখন সেই স্থান জনশূন্য জলশূন্য কটকবনাকীর্ণ অত্যন্ত ভয়ঙ্কর ছিল। এইক্ষণ মক্কা নগরে যেস্থানে জম্জম্ কূপ ও কাবা মন্দির বিদ্যমান সেস্থানে এব্রাহিম স্বীয় পত্নী ও পুত্রকে স্থাপন করিয়া তাঁহাদের নিকটে কতগুলি খোশ্মা ফল ও এক মশক জল রাখিয়া পুস্তান করিলেন। হাজেরা দেখিলেন যে এব্রাহিম তাঁহাকে ফেলিয়া একাকী চলিয়া যাইতেছেন, তখন তিনি সভয়ে আস্তে ব্যস্তে তাঁহার পশ্চাতে দৌড়িয়া জিজ্ঞাসা করিলেন, “তুমি আমাকে এই ভয়ঙ্কর স্থানে একাকী রাখিয়া কোথায় যাইতেছ ?” কোন উত্তর পাইলেন না। এব্রাহিম এই কথায় কর্ণপাত করিলেন না, হাজেরার পুতি দৃষ্টিপাতও করিলেন না। যেহেতু তিনি সারার নিকটে অঙ্গীকার করিয়াছিলেন যে জলহীন ও শস্যহীন দুর্গম স্থানে হাজেরাকে নির্বাসিত করিয়া আসিবেন, তাঁহার সঙ্গে কোন কথা কহিবেন না ও তাঁহার দিকে ফিরিয়া চাহিবেন না। হাজেরা পুনঃ পুনঃ জিজ্ঞাসা করিয়া কিছুই উত্তর না পাইয়া পরে এই মাত্র পুশ্ব করিলেন “নাথ, আজ তুমি আমার পুতি যে আচরণ করিতেছ তাহা কি পরম প্রভুর আদেশ-হুমারে করিতেছ ?” এব্রাহিম বলিলেন, হাঁ। হাজেরা এই কথা শুনিয়া নীরব

* “বোরাক” এক পুকার চতুষ্পদ জন্তু।

হইলেন। এবং এত্রাহিমের পশ্চাৎকামনে ক্ষান্ত রহিলেন। ঈশ্বরের যাহা ইচ্ছা তাহা পূর্ণ হউক বলিয়া মনকে প্রবোধ দিলেন, ঈশ্বরের কৃপার উপর নির্ভর স্থাপন করিয়া রহিলেন, ক্রমে এত্রাহিম তাঁহার দৃষ্টির অন্তরাল হইলেন। তখন হাজেরা করপুটে নিবেদন করিলেন “প্রভু পরমেশ্বর, আমি শিশু পুত্রসহ শস্যহীন জলহীন প্রান্তরে তোমারই আশ্রয়ে বাস করিতেছি।” অতঃপর এত্রাহিম শোকার্তহৃদয়ে অশ্রুপূর্ণনয়নে সারার আলয়ে উপস্থিত হইলেন। সারার সঙ্গে গৃহধর্ম পালন করিতে লাগিলেন, এই সময়ে তাঁহার ও সারার বৃদ্ধাবস্থা, তাঁহার একশতবৎসর সারার নব্বইবৎসর বয়ঃক্রম; তখন সম্ভান হইবে কোন আশা ও সম্ভাবনা ছিল না, তজ্জন্য উভয়ে দুঃখিত। কিন্তু ঈশ্বরের ইচ্ছায় বৃদ্ধাবস্থায় সারা গর্ভবতী হইলেন ও যথাকালে পরম রূপবান্ পুত্র পুসব করিলেন, শিশুর সৌন্দর্যের ছটায় গৃহ আলোকিত হইল। এত্রাহিম তাঁহার নাম এস্হাক রাখিলেন। এই এস্হাকই ইহুদি জাতির আদি পিতা, তাঁহার বংশে মুসা ঈসা প্রভৃতি বহু ধর্মপূর্বক মহাত্মা জন্ম গ্রহণ করিয়া পৃথিবীতে সর্গের আলোক বিস্তার করিয়াছিলেন। কেনানের লোকেরা বলে যে এন্থাক এত্রাহিমের গুঁরস পুত্র নহেন, বৃদ্ধাবস্থায় তিনি তাঁহাকে পুত্ররূপে গ্রহণ করিয়া পালন করিয়াছিলেন।

জন্মের উৎপত্তি ও মক্কা নগরের সূত্রপাত।

এদিকে হাজেরা সেই মহা ভীষণ অরণ্যে স্তন্যপায়ী শিশুটিকে ক্রোড়ে করিয়া বসিয়া রহিলেন। একটি বন্ধু নাই, কোনরূপ আশ্রয় নাই, কি ভয়ানক অবস্থা। কখন মাতা পুত্রের মুখ নিরীক্ষণ করিয়া ক্রন্দন করেন, কখন শিশু জননীর মুখের দিকে তাকাইয়া কান্দিয়া উঠেন। হাজেরা স্বামিপুত্র সেই ধোঁয়াভল ভক্ষণ ও পানীয় পান করিয়া ক্ষুধা ও পিপাসা নিবৃত্তি করিতেছিলেন, এম্মায়িল স্তন্য পান করিয়া জীবিত ছিলেন। অল্পদিন পরে জল নিঃশেষিত হইল, হাজেরা পুত্র পিপাসায় অস্থির হইলেন। এম্মায়িলকে ভূমিতলে স্থাপন করিয়া ইতস্ততঃ জলাবেষণ করিতে লাগিলেন। কোন লোকের সহায়তা প্রাপ্ত হন কি না তাহার অনুসন্ধান করিয়া বেড়াইতে লাগিলেন। সফা গিরি

নিকটে ছিল, তাহার উপরে বাইয়া আরোহণ করিলেন, কাহাকেও দেখিতে না পাইয়া নামিয়া আসিলেন। তথা হইতে মরওয়া শৈলের নিকটে চলিয়া গেলেন, সেখানেও কাহার কোন চিহ্ন পাইলেন না। সফা ও মরওয়ার ব্যবধান দুইশত পদ ভূমি। তিনি জল ও লোকের অন্বেষণে সফা হইতে মরওয়া শৈলে, মরওয়া হইতে সফা শৈলে উন্মাদিনীর ন্যায় দৌড়াদৌড়ি করিতে লাগিলেন। এইরূপ এক পর্বত হইতে পর্বতান্তরে সাত বার করিয়া তাঁহাকে দৌড়িতে হইয়াছিল। ষাঁহার ব্রতধারী হইয়া হজ্জ করিতে মঙ্কা-তীর্থে উপস্থিত হন, হাজেরার সেই প্রধান অন্নপাথ তাঁহাদিগকেও তক্রপ সাত বার করিয়া সফা ও মরওয়ার ধাবমান হইতে হয়। হাজেরা এক এক বার দৌড়িতেছিলেন আর প্রাণাধিক পুত্র এন্মায়িলের সংবাদ লইতেছিলেন, যেহেতু শিশুটি বা হঠাৎ কোন হিংস্র জন্তুর করাল কবলে পতিত হয় এই ভয়ে ভীতছিলেন। ইতি মধ্যে তিনি মরওয়া গিরির দিকে শব্দ শুনিতে পাইলেন, কিন্তু কে কথা বলিতেছে কাহাকেও দেখিতে পাইলেন না। স্থির হইয়া শুনিতে লাগিলেন, কেহ যেন এই বলিতেছে, “হাজেরা, স্বস্থানে ফিরিয়া যাও, তোমার সম্ভান বিনষ্ট হইবে না, সে আপন পিতার সাহায্যে এই স্থানে দৈশ্বরের মন্দির নির্মাণ করিবে, তাহা দ্বারা লোকের অশেষ কল্যাণ হইবে।” হাজেরা এই কথা শ্রবণে মনে সান্ত্বনা লাভ করিয়া এন্মায়িলের নিকটে ফিরিয়া আসিলেন। সেখানে এক জন জ্যোতির্ষয় পুরুষকে দণ্ডায়মান দেখিতে পাইলেন। সেই পুরুষ জিজ্ঞাসা করিলেন “নারি, তুমি কে?” তিনি বলিলেন “আমি এব্রাহিমের ভাৰ্য্যা।” আগন্তুক জিজ্ঞাসা করিলেন “তিনি তোমাকে এই ভয়ানক স্থানে কেন পরিত্যাগ করিয়াছেন ও কাহার আশ্রয়ে রাখিয়াছেন?” হাজেরা বলিলেন “পরমেশ্বরের আশ্রয়ে রাখিয়াছেন।”, তখন সেই তেজস্বী পুরুষ বলিলেন “তিনি উত্তম আশ্রয়ে রাখিয়াছেন, ভয় নাই।” এই বলিয়া অদৃশ্য হইলেন। কথিত আছে হাজেরা সেই সময়ে সম্মুখ ভাগে দৃষ্টি করিয়া হঠাৎ একটি স্ননির্মল জলের উৎস দেখিতে পাইলেন। পরমেশ্বর সেই উৎস হাজেরার জন্য উৎসারিত করিয়াছিলেন। এই প্রস্রবণই জম্জম্ নামে আখ্যাত, ইহার জল পুণ্য জল বলিয়া সমাদৃত। হাজেরা উৎস দেখিয়া মহা আনন্দ

লাভ করেন, তাহার জলপান করিয়া তিনি ও শিশুটি পরিভূক্ত হন।

ইহার কিছুকাল পরে এয়মন দেশের জরহম বংশীয় এক দল বণিক মক্কার পথ দিয়া যাইতে ছিলেন, জলাভাবে তাঁহাদের অত্যন্ত ক্লেশ হইয়া ছিল, তাঁহারা তৃষ্ণায় কাণ্ডর হইয়া ইতস্ততঃ জল অন্বেষণ করিতে ছিলেন। ইতি মধ্যে একদল জলচর পক্ষীকে উড়িয়া আসিতে দেখিলেন। তাঁহারা সেই বিহঙ্গকুল দেখিয়া মনে করিলেন যে এই প্রান্তরের কোন স্থানে অবশ্য জল আছে, যেহেতু এই সকল পক্ষী জল ছাড়া থাকিতে পারে না। ইহা ভাবিয়া তাঁহারা দুই ব্যক্তিকে অনুসন্ধানে প্রেরণ করিলেন। সেই দুই জন জল অন্বেষণ করিতে করিতে সেই উৎসের নিকটে যাইয়া উপস্থিত হয়। তথায় দেখে যে এক পরম রূপবতী নারী একটি সুন্দর শিশুকে সঙ্গ করিয়া প্রস্রবণের এক পার্শ্বে বাস করিতেছেন। সেই প্রস্রবণ দেখিয়া তাহাদের জানন্দের সীমা রহিল না, তাহারা বিস্ময়বিষ্কারিতলোচনে হাজেরার প্রতি দৃষ্টি করিয়া জিজ্ঞাসা করিল “তুমি দেবী, না মানবী?” হাজেরা আত্ম বৃত্তান্ত জ্ঞাপন করিয়া বলিলেন যে “প্রভু পরমেশ্বর দয়া করিয়া আমাকে ও এই বালককে এই নির্ঝর দান করিয়াছেন।” তৎপর তাহারা জম্জমের জল পান করিয়া সেই জল অতিশয় নিম্নল ও সুরস প্রাপ্ত হইল। তৎক্ষণাৎ যাইয়া সঙ্গীদিগকে সবিশেষ জ্ঞাপন করিল। তখন তাঁহারা সকলে সহর্ষে আসিয়া সেই জল পান করিয়া অত্যন্ত সুখী হইলেন, এবং সেই প্রান্তরকে পশু চারণের বিশেষ উপযুক্ত স্থান ও তথাকার বায়ু স্বাস্থ্যকর বলিয়া বোধ করিলেন। আবাসের জন্য তাঁহারা সেই স্থান মনোনীত করিয়া হাজেরার নিকটে বলিলেন যে, “আমরা তোমার প্রতিবেশী হইতে, ইচ্ছা করি, আমাদের দ্বারা তোমার বখোচিত সেবা হইবে।” হাজেরা বলিলেন “এই প্রস্রবণে আমার সম্পূর্ণ স্বত্ব থাকিবে, এই অঙ্গীকারে তোমরা এস্থানে বসতি করিতে পার।” তাঁহারা একথায় সন্মত হন, এবং স্বদেশে যাইয়া স্বজনবর্গ ও গোমেবাদি পশু এবং কভুরা নামক সম্প্রদায়কে সঙ্গ করিয়া চলিয়া আইসেন। উক্ত জরহম জাতি মক্কার উচ্চভূমিতে এবং কভুরা জাতি নিম্ন ভূমিতে বাসস্থান নিরূপণ করিলেন। মজাজনামক ব্যক্তি জরহমদিগের

দলপতি এবং সমিদ্ধা কুতুরাদের দলপতি ছিলেন। তাঁহারা সকলে সে স্থানে গৃহাদি নির্মাণ করিয়া বাস করিতে লাগিলেন, এবং হাজেরা ও এন্মায়িলের প্রতি বিশেষ যত্নপরায়ণ হইলেন। এইরূপে মক্কার নির্জন প্রান্তরে লোকের বসতি হইল। জরহমদিগের সংসর্গ ও বন্ধুতা লাভ করিয়া হাজেরা ও এন্মায়িল অনেক পরিমাণে নিশ্চিন্ত ও সুখী হইলেন। এন্মায়িল তাঁহাদের সাহায্যে উন্নতি লাভ করিতে লাগিলেন ও তাঁহাদিগের নিকটে আরবি ভাষা শিক্ষা করিলেন, কথিত আছে যে আরব্য ভাষায় তিনি প্রথম সুবক্তা বলিয়া পরিচিত হন। তিনি ক্রমে ক্রমে এব্রাহিমের চরিত্রের সঙ্গুণ সকলে অধিকার লাভ করেন, অত্যন্ত ধর্ম্মানুরাগী ও ঈশ্বরে অলস্ত বিশ্বাসী হইয়া উঠেন।

পুত্রবলিদানে এব্রাহিমের প্রত্যাদেশ শ্রবণ করা

ও তাহাতে প্রবৃত্ত হওয়া।

এব্রাহিম মাসান্তে একবার অখারোহণে মক্কার আসিয়া হাজেরা ও এন্মায়িলের সংবাদ লইয়া বাইতেন। তিনি সারাকর্ভুক এই অঙ্গীকারে বদ্ধ হইয়া ছিলেন যে অশ্বপৃষ্ঠ হইতে হাজেরার গৃহে অবতরণ করিয়া তাঁহার সেবা ও আতিথ্য গ্রহণ করিবেন না। সুতরাং সেই অঙ্গীকার পালনের জন্য এব্রাহিম হাজেরার নিকটে আসিয়াই চলিয়া যাইতেন, অশ্ব হইতে নামিয়া বিলম্ব করিতেন না। এই রূপে কতিপয় বৎসর অতীত হয়, ক্রমে এন্মায়িল ষোড়শবৎসর বয়ঃক্রমে উপনীত হন, তাঁহার শরীর সুগঠিত ও বলিষ্ঠ হইয়া উঠে, তখন তিনি সময়ে সময়ে ধনুর্ক্ষাণ লইয়া অরণ্যে মৃগয়া করিতে যাইতেন। তৎকালে এব্রাহিম কখন কখন আসিয়া তাঁহাদের আতিথ্য গ্রহণ পূর্বক দুই এক দিন রাত্রি ষাপন করিতেন। সেই অবস্থায় তিনি একদিন রজনীতে প্রিয়তম সন্তানকে বলিদান করিবার জন্য ঈশ্বরকর্ভুক আদিষ্ট হন। একদল ইতিহাসবেত্তা পণ্ডিত বলেন যে এন্মায়িলের বলিদানে আদেশ হইয়া ছিল, আর একদল এন্মায়িলকে বলিদান করিতে আজ্ঞা হইয়া ছিল বলিয়া নির্ধারণ করেন। এবিষয়ে দুই দলের নির্ধারণে বিষম অনৈক্য। কিন্তু অধিকাংশ প্রধান

ইতিহাসবিদ এস্মায়িলের সম্বন্ধে আদেশ হওয়ার কথাই নির্ধারণ করিয়াছেন, লিখকও সেই অধিকাংশের নির্ধারণ অবলম্বন করিল। একদিন এব্রাহিম স্বপ্নে দেখেন যে এস্মায়িল তাঁহার ক্রোড়ে আছে, এক দেবতা তাঁহার নিকটে উপস্থিত হইয়া তাঁহাকে বলিতেছেন যে “এব্রাহিম, আমি ঈশ্বরের প্রেরিত, পরমেশ্বর বলিতেছেন যে, এই বালককে আমার উদ্দেশ্যে বলিদান কর।” স্বপ্ন দর্শনের পর এব্রাহিমের নিজা ভঙ্গ হইল, তিনি এই ভয়ানক স্বপ্নের বিষয় ভাবিয়া ভীত ও কম্পিত হইলেন, ইহা পাপাস্বরের কার্য্য ভাবিয়া তাহাকে অভিসম্পাতপূর্ব্বক অবশিষ্ট রজনী উপাসনা প্রার্থনায় যাপন করিলেন। পর দিন ভাবিতে লাগিলেন যে, এই স্বপ্ন কি আমার চিন্তাসম্মত, না, পাপাস্বরের কার্য্য, না ঈশ্বরের লীলা; নিশ্চয় কিছুই বুঝিয়া উঠিতে পারিলেন না। সেই দিবস শুদ্ধ স্থানে যাইয়া শুদ্ধ মনে নিদ্রিত হইলেন, পুনর্বার স্বপ্নে দেখিলেন যে দেবতা তাঁহাকে বলিতেছেন “আমি পরমেশ্বরের প্রেরিত, তোমার সন্তানকে ঈশ্বরোদ্দেশ্যে বলি দান কর।” পরক্ষণে এব্রাহিম জাগরিত হইয়া ভাবিতে লাগিলেন যে ইহা কখন শয়তানের কার্য্য নয়, ইহা ঈশ্বরের প্রেরিত স্বপ্ন। সেই দিন পুনরায় স্বপ্নে দেখিলেন যে দেবতা আসিয়া বলিতেছেন “এব্রাহিম, পরমেশ্বর তোমাকে আদেশ করিতেছেন, উঠ, স্বীয় পুত্রকে বলিদান কর, নিশ্চয় জানিও ঈশ্বর পাপ করিতে আজ্ঞা করেন না, সৎকর্মেই আদেশ করিয়া থাকেন।” এই তৃতীয় দিবসের স্বপ্ন দর্শনে এব্রাহিম সম্পূর্ণ নিঃসংশয় হইলেন, জানিলেন যে পুত্রকে বলিদান করার সময় উপস্থিত, ইহা একান্ত ঈশ্বরের অভিপ্রেত। তখন হাজেরার নিকটে যাইয়া বলিলেন, এস্মায়িলকে স্নান করাইয়া তাহার অঙ্গে তৈল মর্দন পূর্ব্বক কেশ বিন্যাস করিয়া দেও, এবং উত্তম পরিচ্ছদ পরাইয়া তাহাকে সুসজ্জিত কর।” হাজেরা জিজ্ঞাসা করিলেন “অদ্য বালককে সুসজ্জিত করিবার কারণ কি ?” এব্রাহিম বলিলেন “তাহাকে কোন বন্ধুর নিকটে লইয়া যাইতেছি, এজন্য তাহার বেশ বিন্যাস আবশ্যিক।” (কেহ কেহ বলেন এব্রাহিম মক্কাতে এই স্বপ্ন দেখেন নাই, কেনানে দেখিয়া এস্মায়িলকে বলিদান করিবার জন্য মক্কায় চলিয়া আসিয়াছিলেন।) অনন্তর এস্মায়িলকে বলিলেন “বৎস,

ছুরিকা ও রজ্জু সঙ্গে লও, কোরবাণি (বলিদান) হইবে।” এন্মায়িল পিতার আজ্ঞানুসারে তাহা লইয়া তাঁহার সঙ্গে সঙ্গে চলিলেন। কতক দূর যাইয়া জিজ্ঞাসা করিলেন “তাত, কোথায় যাইতেছ ?” এব্রাহিম বলিলেন “বন্ধুর নিমন্ত্রণে যাইতেছি।” এন্মায়িল জিজ্ঞাসা করিলেন “সেই বন্ধুর গৃহ কোথায় ?” এব্রাহিম বলিলেন “তাঁহার আলয় পবিত্র ভূমিতে, এই ছ্যলোকপ্রাসাদ ও ভুলোকশয্যা তাঁহারাই কৃত।” এন্মায়িল জিজ্ঞাসা করিলেন “পিতঃ, তোমার সেই সখা আমাদের সঙ্গে কি একত্র ভোজন করিবেন ?” এব্রাহিম বলিলেন, “না, তিনি পান ভোজন করিয়া জীবন ধারণ করেন না, তিনি ভোজন করান, ভোজন করেননা।” সরলপ্রকৃতি এন্মায়িল প্রশ্ন করিলেন “তাত, তোমার সখা কি অত্যন্ত ধনবান ?” এব্রাহিম বলিলেন “হাঁ স্বর্গ মর্ত্যের ঐশ্বর্য তাঁহারই।” কথিত আছে এইরূপ কথোপকথন করিয়া পিতা পুত্র কিয়দূর পথ চলিয়া গেলে পাপপুরুষ ভাবিল যে এন্মায়িল ও তাহার পিতা মাতাকে বিপাকে ফেলিবার এই উপযুক্ত সময়, অন্য সময় সুযোগ ঘটয়া উঠিবে না। ইহা ভাবিয়া সে বৃদ্ধ পুরুষের আকারে প্রথমতঃ হাজ্জেরার নিকটে যাইয়া জিজ্ঞাসা করিল, “এব্রাহিম তোমার সন্তানকে কোথায় লইয়া গিয়াছে ?” হাজ্জেরা বলিলেন “তিনি তাহাকে লইয়া এক বন্ধুর আলয়ে গিয়াছেন।” সেই পুরুষ বলিল “তাহা নয়, বরং তাহাকে বধ করিতে লইয়া গিয়াছে।” হাজ্জেরা বলিলেন “এব্রাহিমের হৃদয় অতিশয় স্নেহ-প্রবণ, তিনি পিতা হইয়া কি পুত্রকে হত্যা করিবেন ? ইহা কখন হইতে পারে না।” বৃদ্ধরূপী পাপপুরুষ বলিল “এব্রাহিমের এইরূপ বিশ্বাস যে এন্মায়িলকে বলিদান করিবার জন্য সে আদিষ্ট হইয়াছে।” তখন হাজ্জেরা বলিলেন “যদি তিনি বলিদানে আদিষ্ট হইয়া থাকেন তবে প্রচুর পরমেশ্বরের আদেশ মন প্রাণে পালন করিতে আমরা প্রস্তুত। ঈশ্বরের আজ্ঞা পালন করা অপেক্ষা কোন্ কার্য শ্রেষ্ঠ।” তখন বৃদ্ধ নিরাশ হইয়া হাজ্জেরার নিকট হইতে চলিয়া গেল, এন্মায়িলের পশ্চাৎ পশ্চাৎ যাইয়া বলিল, “এন্মায়িল, পিতা তোমাকে কোথায় লইয়া যাইতেছেন, অবগত আছ ?” এন্মায়িল বলিলেন “এক বন্ধুর সন্নিধানে লইয়া যাইতেছেন।”

পাপান্নর বলিল “না, তোমাকে হত্যা করিতে লইয়া যাইতেছেন।” এস্মায়িল বলিলেন “পিতা পুত্রকে হত্যা করেন ইহা কি কখন দেখিয়াছ ?” তখন সে বলিল “এব্রাহিম মনে করিতেছে যে ঈশ্বর তাহাকে এরূপ আদেশ করিয়াছেন।” এস্মায়িল বলিলেন “ঈশ্বরের এ প্রকার আজ্ঞা হইয়া থাকিলে তাহা শিরোধার্য্য।” শয়তান এস্মায়িলের নিকট নিরাশ হইয়া এব্রাহিমকে জিজ্ঞাসা করিল “সাধো, তুমি পুত্রকে কোথায় লইয়া যাইতেছ ?” এব্রাহিম বলিলেন “এই পর্ব্বতের গুহায় কোন প্রয়োজনে যাইতেছি।” বুদ্ধ বলিল, তুমি তাহাকে বলিদান করিতে লইয়া যাইতেছ, আমি ঈশ্বরের শপথ করিয়া বলিতেছি, তুমি যে মনে করিতেছ ঈশ্বর এরূপ আদেশ করিয়াছেন তাহা সম্পূর্ণ মিথ্যা, বরং শয়তান স্বপ্নে দর্শন দিয়া এই কথা বলিয়াছে যে আপন পুত্রকে বলিদান কর, সাবধান ! শয়তানের কথায় স্বীয় স্নেহাস্পদ তনয়কে বধ করিও না, পরে সন্তাপিত হইবে, সেই সময় অন্নাতাপ করিয়া কোন লাভ হইবে না।” তখন এব্রাহিম বৃথিতে পারিলেন যে এই বুদ্ধই শয়তান, দূর হও বলিয়া ধম্কাইয়া তাহাকে দূর করিয়া দিলেন, এবং বলিলেন “নিশ্চয় ঈশ্বর আমার এই স্বদয়নন্দন পুত্র এস্মায়িলকে বলিদান করিতে আমার প্রতি আদেশ করিয়াছেন, আমি দ্বারা ও আমার সন্তান দ্বারা তোমার মনোরথ সিদ্ধ হইবে না।” এই কথা শুনিয়া বর্ষীয়ান ক্ষুর ও নিরাশ হইয়া প্রস্থান করিল। পর্ব্বতের ভিতর হইতে এই রূপ শব্দ হইল, “এস্মায়িল, এইক্ষণ পিতা তোমার শোনি-তপাত করিবে, আমার গর্ভে তোমার কবর হইবে।” পর্ব্বতে এই ভয়ঙ্কর ধ্বনি হইল শুনিয়া এস্মায়িল বলিলেন “পিতা, পর্ব্বত আমাকে এই আশ্চর্য্য কথা শুনাইতেছে।” তিনি যাহা শুনিয়া ছিলেন তাহা পিতাকে জ্ঞানাইলেন। এব্রাহিম বলিলেন “বৎস, উহা পাপপিশাচের উক্তি, পর্ব্বতের ভিতর হইতে সে এই কথা বলিতেছে, তৎপ্রতি মনোযোগ করিও না।” অতঃপর এব্রাহিম তাঁহাকে সঙ্গে করিয়া গিরিগুহায় লইয়া উপস্থিত হইলেন। তখন তিনি বলিলেন “বৎস, সত্যই আমি স্বপ্নে দেখিয়াছি যে তোমাকে বলিদান করিতেছি, এইক্ষণ তোমার কি অভিপ্রায়।” এস্মায়িল এই নিদারুণ কথা শুনিয়াও কিছুই বিচলিত হইলেন না, শান্তভাবে জিজ্ঞাসা করিলেন

“পিতঃ, প্রভু পরমেশ্বর কি আমাকে বলিদান করিবার জন্য আদেশ করিয়াছেন?” এত্রাহিম বলিলেন। “হাঁ, তিনি আদেশ করিয়াছেন।” এই কথা শুনিয়া এস্মায়িল অক্ষুণ্ণমনে বলিলেন “এই দেহ প্রভুর কার্যে যায় হইবে আমার সৌভাগ্যের বিষয়, প্রভুর আদেশ হইয়া থাকিলে আর বিলম্ব করিবে না, কেননা বিলম্ব হইলে আঞ্জা সম্পাদনে বিঘ্ন উপস্থিত হইবে। সত্ত্বর আমার হস্ত পদ বন্ধন করিয়া গলদেশে ছুরিকা অর্পণ কর।” পরে বা স্নেহবশতঃ এত্রাহিম বলিদানে সঙ্কুচিত হন এবং মৃত্যুভয়ে ভীত হইয়া নিজের অধৈর্য্য ও অনিচ্ছুক হন, এজন্য এস্মায়িল বলিদানে সত্ত্বর হইবার জন্য পিতাকে পুনঃ পুনঃ অহরোধ করিতে লাগিলেন, কিরূপ প্রাণালীতে বন্ধন ও স্থাপন করিয়া বলিদান করিতে সহজ হইবে নিজেই পিতাকে তাহা বলিয়া দিলেন। এত্রাহিম এস্মায়িলকে তজ্জপ বন্ধন ও বেদীর উপর স্থাপন করিয়া ছুরিকা হস্তে বলিদানে প্রবৃত্ত হইয়াছেন এমন সময় অধ্যাত্ম জগতের এই ধ্বনি শুনিতে পাইলেন “এত্রাহিম, তুমি আমার আঞ্জা পালন করিয়াছ, ক্লান্ত হও, স্নেহভাজন পুত্রকে আর বলিদান করিতে হইবে না, তুমি আমার যথার্থ দাস, এইক্ষণ তোমার প্রতি আমার কৃপা প্রকাশের সময় উপস্থিত, পশ্চাৎগো দৃষ্টি কর, যাহা তোমার নয়নগোচর হয় তাহা আমার উদ্দেশ্যে বলিদান কর।” এই মহাবাণী শ্রবণে এত্রাহিম পশ্চাদিকে দৃষ্টিপাত করিয়া দেখিলেন যে, একটি প্রাচীন মেঘ পর্কৃত হইতে তাঁহার দিকে দৌড়িয়া আসিতেছে, তৎক্ষণাৎ তিনি সেই মেঘটিকে যাইয়া ধরিলেন, এবং এস্মায়িলকে বন্ধনমুক্ত করিয়া তাঁহার পরিবর্তে সেই মেঘটিকে বলিদান করিলেন। তখন পিতাপুত্র উভয়ে ঈশ্বরকে পুনঃ পুনঃ ধন্যবাদ করিয়া আনন্দমনে গৃহে চলিয়া গেলেন।

কাবা মন্দির স্থাপন।

হাজেরার আগমনের পর মক্কার অরণ্য কি প্রকারে লোকালয়ে পরিণত হয় পূর্বে তাহা বিবৃত হইয়াছে, ক্রমে লোক বৃদ্ধি হইয়া নগরে পরিণত

হয়। এব্রাহিম হইতেই মক্কা নগরের সূত্রপাত ও তাঁহা হইতেই সেই স্থান তীর্থে পরিণত হইয়া উঠে। তিনি একমাত্র অদ্বিতীয় নিরাকার ঈশ্বরের পূজা প্রতিষ্ঠিত করিবার জন্য তথায় এক মন্দির স্থাপন করেন। এব্রাহিম স্বয়ং স্থপতি হইয়া এসম্মায়িলের সাহায্যে মন্দিরের ভিত্তি স্থাপন ও প্রাচীর নির্মাণ করিয়া ছিলেন। এব্রাহিম প্রতিষ্ঠিত সেই মন্দিরই বর্তমান কাবা মন্দির। ইহার এইক্ষণ পূর্বের অবস্থা নাই, পুনঃ পুনঃ জীর্ণসংস্কার করিতে হইয়াছে। এব্রাহিমের সময় হইতেই এই মন্দিরের মহা গোঁরব ও মাহান্মা, এইক্ষণও নানাদেশের লক্ষ লক্ষ যাত্রী আসিয়া এই মন্দির দর্শন ও প্রদক্ষিণাদি করিয়া থাকে। মন্দিরের পার্শ্বে এক খণ্ড প্রস্তরের উপর এব্রাহিমের পদচিহ্ন আছে, তাহাকে লোকে বিশেষ সম্মান করিয়া থাকে। কাল ক্রমে প্রতিমার বিনাশকারী এব্রাহিমের এই মন্দিরে প্রতিমা সকল প্রতিষ্ঠিত হইয়া পূজিত হয়, বহুকাল যাত্রিকগণ এখানে প্রতিমা দর্শন ও অর্চনা করিতে আইসে। অনন্তর প্রায় তের শত বৎসর হইল এসলাম ধর্মের প্রবর্তক হজরত মোহম্মদ সেই সমুদয় প্রতিমা ধ্বংস করিয়া কাবামন্দিরে অদ্বিতীয় নিরাকার ঈশ্বরের উপাসনা প্রতিষ্ঠিত করিয়াছেন। তদবধি কাবার সঙ্গে পৌত্তলিকতার কোন সংশ্বব নাই।

এব্রাহিমের দান ও আতিথ্য সংকার।

এব্রাহিমের অগণ্য গোমেবাদি পশু ছিল, তিনি সেই পশুপাল চরাইতেন ও তদ্বারা উপজীকা নির্বাহ করিতেন। একদিন একজন ভিক্ষুক আসিয়া তাঁহার নিকটে ঈশ্বরগুণাহুকীর্তন করিয়াছিলেন; তৎশ্রবণে এব্রাহিম প্রেমামানন্দে বিহ্বল হইয়া সেই ভিক্ষুককে নিজের সমুদায় সম্পত্তি প্রদান করেন। এব্রাহিম অতিথিকে অত্যন্ত আদর করিতেন, আতিথ্য সংকারে তাঁহার বিশেষ অনুরাগ ও শ্রদ্ধা ছিল। একদিন তিনি একজন ভোজন করিবার আকাঙ্ক্ষায় অতিথির অন্বেষণ করিতে ছিলেন। পথে এক বৃদ্ধকে পাইয়া গৃহে লইয়া আইসেন। বৃদ্ধ ধর্মবিরোধী ছিল, এব্রাহিম ইহা জানিতে পাইয়া

অনেক ধর্মোপদেশ দিলেন, তাহার মন পরিবর্তনের জন্য বহুচেষ্টা করিলেন, কোন মতেই সে, ধর্ম গ্রহণে সম্মত হইল না। এত্রাহিমের পীড়াপীড়িতে বুদ্ধ ক্ষুব্ধ হইয়া ভোজন না করিয়াই চলিয়া গেল। তখন পরমেশ্বর এত্রাহিমকে অল্পযোগ করিয়া বলিলেন “এত্রাহিম, আমি এই বুদ্ধকে তাহার বিদ্রোহিতা সঙ্গে চিরজীবন অনাদান করিয়াছি, আমার ভাণ্ডার তাহার জন্য সর্বদা উন্মুক্ত রহিয়াছে, অদ্য এক দিনমাত্র অপ্নের জন্য তোমার প্রতি সে অর্পিত হইয়াছিল, হায় ! তাহাকে ভূমি অগ্নে বর্ষিত করিয়া ক্ষুধিত অবস্থার কিরাইয়া দিলে।” এত্রাহিম এই বাণী শ্রবণ করিয়া বৃদ্ধের পশ্চাতে দৌড়িলেন, ও সবিশেষ অহুরোধ করিয়া তাহাকে কিরাইয়া লইয়া আসিলেন। বুদ্ধ পূর্বে অনাদর পরে আদর করার কারণ জিজ্ঞাসা করিলে এত্রাহিম সেই প্রত্যাদেশের কথা জানাইলেন। এই কথা বৃদ্ধের মনে অশ্চর্য সংক্রামিত হইল। এই বিষয় বিদ্রোহী পাষাণের প্রতি তাঁহার এত দয়া এই বলিয়া সে কাঁদিতে লাগিল, এবং ধর্মে দীক্ষিত হইয়া ঈশ্বরের একজন পরম ভক্ত হইল।

এত্রাহিমের পুত্র মদয়ন।

মহাপুরুষ এত্রাহিমের পুত্র মদয়ন সারার গর্ভজাত, না হাজেরার তাহার নিশ্চয় তত্ত্ব পাওয়া যায় নাই। বোধ করি মদয়ন হাজেরার গর্ভোৎপন্ন এশ্মায়িলের অল্পজ ছিলেন। সারা বক্ষ্যা বলিয়াই প্রসিদ্ধ। কেহ কেহ বলেন ঈশ্বরের বিশেষ অল্পগ্রহে বুদ্ধাবস্থায় তাঁহার গর্ভে একমাত্র এস্হাক জন্ম গ্রহণ করিয়াছিলেন, কেহ কেহ বলেন এস্হাক তাঁহার গর্ভজাত পুত্র নহেন, পালিত পুত্র ছিলেন। মদয়নের বংশোৎপন্ন লোকেরা মদয়ন জাতি বলিয়া খ্যাত হয়। কোরাণশরীফে ঈশ্বরের উক্তিস্থলে উল্লিখিত হইয়াছে যে “মদয়ন জাতির প্রতি তাঁহার ভ্রাতা শোঅয়বকে (প্রেরণ করিয়া ছিলাম”) ডক্সিরে বিবৃত হইয়াছে যে “মদয়ন জাতি ক্ষুদ্র ও বৃহৎ দুই প্রকার তুল ও পরিমাণ যন্ত্র রাখিত, বৃহৎ যন্ত্রদ্বারা ক্রয় ক্ষুদ্র যন্ত্রদ্বারা বিক্রয় করিত, এইরূপে তাহার সকলকে ঠকাইত। শোঅয়ব এই প্রবঞ্চনা হইতে নিবৃত্ত হইবার

জন্য শাহাদিগকে উপদেশ দান করেন। মহাপুরুষ এত্রাহিমের এক পুত্রের নাম মদয়ন, সেই মদয়নের বংশোদ্ভব লোকদিগকে মদয়ন জাতি বলে, তাহাদের প্রতি শোভয়ব প্রেরিত হইয়াছিলেন।” মদয়ন নম্রুদের কন্যা রগজার পানিগ্রহণ করিয়াছিলেন। অগ্নি পরীক্ষা ব্যাপারের পর এত্রাহিমের প্রতি রগজার বিশেষ ভক্তি জন্মিয়া ছিল, তখন তিনি তাঁহার নিকটে যাইয়া ধর্মগ্রহণ করেন। নম্রুদ কন্যার এই আচরণে অত্যন্ত ক্রুদ্ধ হয়, ও তাঁহাকে কারারুদ্ধ করিয়া বহু বৎসর নানা প্রকার যন্ত্রণা দান করে। অবশেষে রগজা পরমেশ্বরের অন্তুত কৌশল ও কৃপা বলে এই বিপদ হইতে মুক্ত হইয়া এত্রাহিমের নিকটে যাইয়া উপস্থিত হন। এত্রাহিম তাঁহাকে সাদরে গ্রহণ করেন। তিনি কিছুকাল এত্রাহিমের সঙ্গে দেশ পর্যটনে থাকিয়া নানা প্রকার কষ্টভার বহন করিয়াছিলেন। তৎপর এত্রাহিম স্ত্রীর পুত্র মদয়নের সঙ্গে তাঁহার বিবাহ দেন। রগজার গর্ভে মদয়নের ক্রমে বিংশতি সন্তান জন্মগ্রহণ করে।

এত্রাহিমের জীবনের মহত্ব।

মহাপুরুষ এত্রাহিমের প্রতি হাজারত মোহম্বদের প্রগাঢ় শ্রদ্ধা ছিল, তিনি আপনাকে তাঁহার অনুবর্তী বলিয়া পুনঃ পুনঃ স্বীকার করিয়াছেন ও লোকদিগকে বলিয়াছেন যে তোমরা এত্রাহিমের ধর্মের অনুসরণ কর। মহাত্মা এত্রাহিমের জীবনে প্রত্যাদেশের গৌরব আশ্চর্যরূপে রক্ষা পাইয়াছে। তিনি পরমেশ্বরের একান্ত অনুগত জলন্ত বিখাসী ভূত্য ছিলেন, ঈশ্বরাদেশ ও তাঁহার প্রেমের অনুরোধে আপন শরীর স্বী পুত্র সম্পত্তি বিসর্জন করিতে কিছুমাত্র কুণ্ঠিত হন নাই। হাসিতে হাসিতে প্রজ্বলিত হুতাশনে প্রবেশ করিলেন, ঘোর অরণ্যে স্বী পুত্র পরিত্যাগ করিয়া আসিলেন, এক তিস্তুরের মুখে ঈশ্বরের গুণকীর্তন শুনিয়া তাহাকে আপনার সর্বস্ব দান করিলেন। কলাফল চিন্তা কিছুই করিলেন না। ঈশ্বরপ্রেমে মত্ত ঈশ্বরের একান্ত আজ্ঞাকারী ভূত্য কাহাকে বলে তিনি আপন জীবন দ্বারা যেরূপ দৃষ্টান্ত প্রদর্শন করিয়াছেন এরূপ বিরল।

এব্রাহিম দীর্ঘ জীবন লাভ করিয়া ছিলেন, কেহ বলেন যে তিনি দুই শত বৎসর জীবিত ছিলেন। কেহ বলেন পঞ্চান্বব্বই বৎসর জীবন ধারণ করিয়াছিলেন। এব্রাহিম হইতে ঙ্গক্ষেদ সংস্কার প্রবর্তিত হয়, এব্রাহিম প্রথম পাদুকা ও পায়জামা পরিধান করেন।



উপদেশবারী।

পরমেশ্বর এব্রাহিমকে বিংশতি পুস্তিকা দান করিয়া ছিলেন। প্রায় সকল পুস্তিকাই উপদেশপূর্ণ, সেই সকল উপদেশের কয়েকটি উপদেশ নিম্নে অঙ্ক-বাদ করিয়া দেওয়া গেল।

“হে মানব, তোমার প্রাত্যহিক উপাসনা সাধনের জন্য আমি তোমার প্রতি প্রসন্ন, তুমিও আমার প্রদত্ত প্রাত্যহিক উপজীবিকা লাভ করিয়া আমার প্রতি সন্তুষ্ট থাক।

হে মানব, যাহা তুমি প্রাপ্ত হইয়াছ তাহা ভবিষ্যদ্বিবেকের জন্য প্রেরণ কর।

হে মানব, যিনি তোমাকে দান করিয়াছেন তুমি তাঁহার প্রতি কৃতজ্ঞ হও, যে ব্যক্তি তোমার প্রতি কৃতজ্ঞ তুমি তাহাকে দান কর।

হে মানব, তুমি সমগ্র জীবন অনিত্য সংসার উপার্জনে ব্যয় করিলে, পরলোক সাধন কখন করিবে ?

হে মানব, আমি তোমার চক্ষুর উপর আবরণ এজন্য স্বজন করিয়াছি যে কুদৃষ্টি হইবার উপক্রম হইলে চক্ষুকে অবরোধ করিবে, এবং তোমার মুখের উপর অধরোষ্ঠরূপ কপাট এজন্য স্থাপন করিয়াছি যে কুবাক্য বলিবার উপক্রম হইলে তাহা দ্বারা মুখ বন্ধ করিবে।

হে মানব, যাহারা বহু আশা করিয়া সংসারামেষণ করে ও অল্প অহুষ্ঠান করিয়া পরলোক আকাঙ্ক্ষা করে, যাহাদিগের কথা ঋষিদিগের ন্যায় কিছু কার্য কপটের; যাহারা দান না পাইলে অসহিষ্ণু হয়, আকাঙ্ক্ষা পূর্ণ না হইলে দৈর্ঘ্য ধারণ করিতে পারে না, তুমি তাহাদিগের দলভূক্ত হইও না।

হে মানব, যে ব্যক্তি নিজের জন্য তোমাকে প্রেম করে সে প্রেম করে না, আমি তোমাকে তোমার জন্য প্রেম করিতেছি, সাবধান, আমা হইতে দূর হইও না ।

হে মানব, তোমার পলায় নিজের ও অন্যের দোষের বুলী বুলিতেছে, তুমি অন্যের দোষের প্রতি চক্ষু স্থাপন করিয়া আছ, আপনার দোষের প্রতি চক্ষু মুদ্রিত করিয়া রক্ষিয়াছ, ইহা উচিত নয় ।

হে মানব, যদি তুমি স্বর্গ আকাঙ্ক্ষা কর তবে প্রভু পরমেশ্বরের ভজনা করিতে থাক, যে কার্য আমার প্রিয় তুমি তাহা কর, তাহা হইলে আমি তোমার প্রিয় যাহা, তাহা সম্পাদন করিব । তুমি নরককে স্থগা কর, তোমার ঈশ্বরও পাপকে স্থগা করিয়া থাকেন, তুমি আমার স্থগার সামগ্রীকে অর্থাৎ পাপকে পরিত্যাগ কর, আমিও তোমার স্থগার সামগ্রী নরক হইতে তোমাকে রক্ষা করিব ।

হে মানব, সংশয় হইতে দূরে থাক তাহা হইলে আমাকে জানিতে পাইবে ; ভোগে বিরক্ত হও তাহা হইলে আমাকে দেখিতে পাইবে ; এবং আমার ভজন্যর জন্য আপনাকে প্রস্তুত কর আমার সঙ্গে মিলিত হইবে ।

দুঃখী মানব সংসারের জন্য যাহা করিয়া থাকে স্বর্গ লোকের জন্য যদি তাহা করে তবে ঈশ্বর তাহাকে অবাধে স্বর্গে লইয়া যান ; ঈশ্বর যাহা দান করিয়াছেন তাহাতে যদি সে ধৈর্য ধারণ করে তবে ঈশ্বর তাহাকে পৃথিবীতে ভাগ্যবান করেন ; যদি সে অবৈধ পরিত্যাগ করে তবে স্বীয় ধর্মকে বিশুদ্ধ রাখিতে পারে ; এবং যদি অসত্য পরিত্যাগ করে তবে সে একজন ঈশ্বরের সত্য বন্ধু হয় ।

হে মানব, যাহা তোমার আছে তাহা হইতে ভিক্ষুক দরিদ্রকে বঞ্চিত করিও না, তাহা হইলে আমিও তোমা হইতে দয়া বঞ্চিত করিব না, আমি যেমন তোমার অতিথিকে আদর করি তুমি আমার অতিথিকে সেরূপ আদর করিও । এব্রাহিম জিজ্ঞাসা করিলেন “প্রভো, কে তোমার অতিথি ?” প্রভূদেশ হইল, “যে দীন হীন ভিক্ষুক তোমার নিকটে উপস্থিত হয় সে আমার অতিথি ।”

তোমরা সর্বদা পাপ করিতেছ, আমি পূর্ণ ক্ষমাশীল, আমার নিকটে

প্রত্যাগমন কর ও অনুভাপ কর, তাহা হইলে তোমারা বাহা করিয়াছ কমা করিব, সঙ্কচিত হইব না।

হে মানব, যখন তোমার ক্রোধ হয় তখন আমাকে স্মরণ করিও, তাহা হইলে আমি দয়ার সহিত তোমাকে স্মরণ করিব।

হে মানব, যে ব্যক্তি অল্প উপজীবিকা লাভে আমার প্রতি সন্তুষ্ট, আমিও অল্প ধর্ম্মানুষ্ঠানে তাহার প্রতি সন্তুষ্ট।

হে মানব, তিনটি বস্তু আছে তাহার একটির সঙ্গে আমার বিশেষ সম্বন্ধ, আর একটির সঙ্গে তোমার বিশেষ সম্বন্ধ, অপরটি তোমার ও আমার মধ্যে বিশেষ সম্বন্ধ। প্রথমটি তোমার শরীরস্থ আত্মা, দ্বিতীয়টি তোমার ক্রিয়া, তৃতীয়টি প্রার্থনা।

হে মানব, “ঈশ্বর বৈ উপাস্য নাই” এই কথা বলিয়া কেহ কখন স্বর্গে যায় না। যে ব্যক্তি তৎসঙ্গে এই কয়েকটি অনুষ্ঠান করে, যথা;—আমার মন্দিরে বিনীত হয়, আমার প্রসঙ্গে জীবন যাপন করে, আমার অনুরোধে অবৈধ বিষয় হইতে আত্মাকে নিবৃত্ত রাখে, আমার সন্তোষের জন্য দীন দুঃখী দিগকে আপনার পার্শ্বে স্থান দান করে, অনাত্মের প্রতি দয়া করে, ফকির দিগের সঙ্গে সম্বন্ধ করে, সেই স্বর্গে যায়।

হে মানব, যে পরিমাণে তোমার মন সংসারের প্রতি অনুরাগী হইবে সে পরিমাণে তোমার অন্তরহইতে আমার প্রেম প্রত্যাহত হইবে, যে পরিমাণে তুমি সংসারে লোভী হইবে সে পরিমাণে আমি তোমাহইতে ধর্ম্মের মিষ্টতাকে হ্রস্ব করিব।

হে মানব, তোমাকে আমি বিষয় সঞ্চয় করিবার জন্য সৃষ্টি করি নাই, ধর্ম্মোপার্জনের জন্য সৃষ্টি করিয়াছি।

হে মানব, পুনঃ পুনঃ আমার সান্নিধ্য অব্বেষণ কর, মন্দির নির্মাণ করিয়া তুমি আমার প্রতিবেশী হও, তত্ত্ববিদ জ্ঞানীদিগের সঙ্গে সহবাস করিয়া আমার সন্তোষ অব্বেষণ কর, অসত্যকে পরিত্যাগ করিয়া প্রাতঃকালে ও অন্য এক সময়ে আমাকে কিছুকাল স্মরণ কর, আমি এই দুই সময়ের মধ্যে তোমার প্রতি প্রচুর কল্যাণ বিধান করিব।

হে মানব, তুমি প্রার্থনায় প্রাস্ত হইও না, আমি প্রার্থনা পূর্ণ করিতে

শ্রাস্ত নহি ; যদিচ বহুপাপ করিয়াছ তথাপি আমার দয়ার নিরাশ হইও না, আমার দয়া সকলের প্রতি উন্মুক্ত ।

হে মানব, তোমার প্রার্থনা ও অবেষণ ব্যতিরেকে আমি স্নায় দয়া গুণে তোমাকে ধর্মবিধাস দিয়াছি, অভাব প্রার্থনা ও অবেষণ সবে কেমন করিয়া আমি তোমাকে স্বর্গ দানে কৃপণতা করিব ?

হে মানব, যে ব্যক্তি তোমাহইতে বিচ্ছিন্ন হয় তুমি তাহার সঙ্গে যাইয়া মিলিত হইও। যে ব্যক্তি তোমাকে দানে বঞ্চিত করে তুমি তাহাকে দান করিও, যে ব্যক্তি তোমার সঙ্গে কথা বলে না তুমি তাহার সঙ্গে কথা বলিও, যে ব্যক্তি তোমার ক্ষতি করে তুমি তাহার হিত সাধন করিও, তাহা হইলে তুমি স্বর্গবাসী অগ্রগামী লোকদিগের একজন হইবে ।

এব্রাহিম জিজ্ঞাসা করিয়াছিলেন “ প্রভো, যে ব্যক্তি তোমার ভয়ে মুখমণ্ডল অশ্রুজলে অভিষিক্ত করে সে, কি পুরস্কার পাইবে ? ” পরমেশ্বর বলিলেন “ তাহার পুরস্কার আমার ক্ষমা, আমার স্বর্গ ” এব্রাহিম জিজ্ঞাসা করিয়াছিলেন “ প্রভো, যে ব্যক্তি বিধবারও নিরাশ্রয় বালকের আশ্রয় হয় তাহার কি পুরস্কার ? ” ঈশ্বর বলিলেন “ আমি আপন স্বর্গের আশ্রয়ে তাহাকে রক্ষা করি । ”